

ناسک یا وطن ج 1



الكتاب : ناسك يا وطن ج 1

الكاتب : جمعة قابيل

تصميم الغلاف : محمد محسن

تنسيق داخلي : يوسف الفرماوي

الطبعة : الأولى ٢٠٢٠

رقم الإيداع: 2020 /4513

الترقام الدولي : 9-43-6783-977-978

الناشر : السعيد للنشر والتوزيع

المدير العام : لمياء السعيد

برج الهادي - الدور الأول - 36 ش عبد الحميد الديب - شبرا مصر

0222017260 – 01550096215

elsaidpublisher@gmail.com

جميع الحقوق محفوظة للناشر

ناسڪ يا وطن ج 1

تأليف

جمعة قابيل



(1)

قبل ان تقرأ:

في كل بلاد الدنيا اذا اردت ان تحكم على مجتمع من حيث التقدم والرقى والإنسانية فانظر اولاً الى نخبة هذا المجتمع .. فان كانوا صالحين واسوياء ووطنيين ورموزاً تقتمدى فتأكد انك ستجد مجتمعاً حضارياً وانسانياً بكل معنى الكلمة

اما اذا وجدت النخبة المتصدرة للمشهد فاسده ويحكمها المصالح والمكائد والكذب والأناية فلا تندعش اذا اكتشفت ان هذا المجتمع يمتلئ بكل انواع الظلم والطبقية والفساد بكل الوانه

وهذا الامر لا علاقة له بالديانات او أي شعارات دينيه او عقائدية فكم من امة لا دين لها تتمسك بأخلاقيات التعامل وقيم التحضر وكم من غيرها رفع شعار التدين وانتشر فيها القتل والدمار والسرقا والرشاوى والخيانا وكل ما نعرف او لانعرف من فساد الذمم وغياب الضمائر وسوء الاخلاق

واذا طبقنا هذا المعيار على مجتمعنا المصري خاصة والعربي عامة بعد ما سمي الثورات العربية التي بدأت من تونس ومرت بمصر وليبيا وسوريا واليمن وغيرها سنكتشف ما يندى له الجبين وما يخجل منه كل انسان عاقل يفكر او لديه قلب ينبض

ولنا ان نسأل هل كانت النخبة على قدر المسؤولية الوطنية .. هل امتلكت ثقافة احتواء مجتمعها والحفاظ على اوطانها .. هل واجهت كل التأمرا على بلدانها بإخلاص .. هل تعاملت مع طوفان الفوضى بشفافية وتجرد .. ام تركت الامور تجري كما خطط لها وراحت تنتهز

الفرص لتحقيق اكبر المكاسب الخاصة على جثث الاف القتلى من الاطفال والنساء والشيوخ وعلى حساب ملايين المرشدين واللاجئين الهاربين من جحيم لا يرحم ..؟؟

ونصل الى السؤال الأهم .. هل بادر البعض من هذه النخبة الى تبني قضايا مجتمعه .. هل شعر أحدهم بالفقراء والبسطاء في كل أرجاء وطنهم .. هل حاولوا مد يد المساعدة لأب يعانى في تربية أطفاله .. أو أم تحلم بسقف يأويها هي وأولادها .. أو شاب يبحث عن فرصة عمل شريفه .. أو فتاه تنتظر فارس أحلامها ويعوقه تكاليف زواج لن يتم .. ثم وهذا ربما أهم مما سبق ..

هل بادرت هذه النخبة بالذهاب الى القرى الفقيرة التي يعيش أهلها بلا ماء أو كهرباء أو حتى صرف صحى أدمى .. هل ذهبوا الى الأحياء الأكثر فقرا بإخلاص لتبني مبادرات مخلصه وليست للشو الإعلامي لبناء مستشفيات ومدارس ودور علم .. هل حاول بعضهم أنكار ذاته وتقديم المصلحة المجتمعية على مصلحته الشخصية بتجرد وإنسانيه كما فعل ويفعل مشاهير وأثرياء العالم الذى نتهمه بالكفر وعدم الأيمان بداية من بيل جيتس وليس نهاية بأنجيلينا جولي ومايكل جاكسون

أسئلتنا وكتابنا ناسك يا وطن لا ولن يرفع شعار المثالية أو البحث عن المدينة الفاضلة ولكنه بمنتهى الأمانة صرخة ضمير في وجه معظم نخبتنا ومشاهيرنا الذين لم يسأل أحدهم نفسه سؤالا ماذا قدم هو لمجتمعه وناسه البسطاء والطيبين بعدما أخذ كل شيء المال والشهرة والسلطة والجاه؟؟؟

وفي الجزء الأول من كتاب ناسك يا وطن اقتربنا من بعض مشاهير وأثرياء الوطن لنعرف عنهم أكثر ونتعرف على رحلة حياتهم سلبا وإيجابا بكل صدق ونضع يدنا على دورهم الحقيقي في أهم فتره عاشها الوطن في تاريخه المعاصر .. لنقول شكرا لكل من أعطى مقابل ما أخذ .. ونقول عفوا لكل من قصر في حق ناس هذا الوطن .. ولتكون هذه السطور شهادة حق للأجيال القادمة عن دور النخبة في بناء أو هدم وطننا الذي يعاني أمراضا مجتمعيه مرعبه صحيا وتعليميا وثقافيا ودينيا وإنسانيا لأسباب كثيره ومتعدده أولها أنتشار الفساد وخراب الذمم وتسيد الجهل وتعتمد إفقار وأضعاف الشباب لسنوات طويله ولأهداف كبرى ليس مجالها صفحات هذا الكتاب

وقد تعمدت أن تكون لغة الكتاب في معظم الوقت هي اللهجة العامية أو الصحفية التي تكلمت بها في حلقات برنامج ناسك يا وطن حتى تصل بسهولة الى كل الثقافات خاصة الجيل الشاب الذي وقع ضحية سوء التعليم بالمدارس فخرج منها لا يتقن لغته العربية ومن حقه أن يقرأ ويعرف ويتعلم مهما كانت درجة ثقافته .. وبسم الله نبدأ وعليه نتوكل فهو ثم الوطن من وراء القصد

جمعه قابيل

(2)

الشباب والبرادعي

أنفض صلاح من مقعده وراح يبحث كالمجنون في كل مكان عن شيء ما وهو يصرخ على زوجته فرح التي جاءت مسرعة

فرح: فيه ايه يا صلاح

صلاح: فين الريموت

فرح : ريموت ايه

صلاح: التليفزيون

فرح: وده ال معصبك كده

صلاح: لا ال معصبي ده

نظرت فرح الى التليفزيون فوجدت على شاشته برنامج ناسك يا وطن ويتابعه صلاح باهتمام كل حلقة .. وكانت الحلقة عن محمد البرادعي العالم والسياسي المصري المعروف .. بحثت معه عن الريموت حتى وجدته .. واغلق صلاح التليفزيون وهو في قمة الغضب .. وخرج الى بلكونة الشقة وهو يتنهد وخلفه زوجته المندمسة

أشعل صلاح سيجارته وراح بخياله بعيدا وهو يتذكر ويسأل نفسه

الف سؤال وسؤال

وبينما هو غارق في خياله .. اقتربت فرح من زوجها .. ونظرت اليه في رفق وألم .. فقد شاركته أحلاما كثيرة .. وعاشت معه طموحات لا حصر لها .. وهاهما يواجهان مالم يخطر ببالهما ابدا !!

فرح .. الفتاه المصرية .. الجامعية .. الجميلة .. الهادئة .. المرحة .. المنطلقة .. الواثقة من نفسها ومن نجاحها في الحياه .. والتي ارتبطت بعلاقة حب ثم خطوبه وزواج مع صلاح الذى سبقها بعامين فقط في نفس تخصصها بكلية الاعلام .. هاهما وبعدهما تخيلا انهما اقتربا من تحقيق حلمهما يكتشفان الاسوأ .. ويعيشان الواقع المر

نظر صلاح الى زوجته فوجدها ذهبت هي الاخرى بخيالها بعيدا .. فراح يضمها الى صدره ويعدل من تسريحة شعرها المتهدل ويقبلها في جبينها بحب واحتواء .. وراحت هي تغوص بين ذراعيه وكأنهما يحتميان ببعضهما في خوف من مجهول لا يعرفانه او يهربان من خطر يقترب منهما وهما في حالة صدمة وذهول

همس صلاح : عارف انك مصدومة يا فرح

فرح: حاسة بيك يا صلاح

صلاح: معقول هم دول قدوتنا

فرح: معقول فيه ناس كده

صلاح: أزاي بيكدبوا كده ممنتهى الصدق

فرح: أزاي بيتاجروا كده بكل حاجه

صلاح: معقول سياسي يتاجر ببلده

فرح: معقول إعلامي مثقف يتاجر بناسه

صلاح: معقول فنان ونجم يبيع الوهم للناس

فرح: والاهم معقول رجل دين يعمل ملايين بتجارته بالدين

لحظات صمت حائره بينهما مليئة بألف سؤال وسؤال

وفجأة تقطع فرح الصمت وتساءل في حيرة

فرح: احكي لي يا صلاح عن البرادعي

صلاح: البرادعي انهى يا فرح .. البرادعي ال فرحنا به واعتبرناه

الامل ولا البرادعي ال اكتشفناه واتخذعنا فيه

فرح: احكي لي يا صلاح عاوزه اعرف مين هو البرادعي .. احكي لي

وقولي اخدت ايه مصر من البرادعي بعد ما ادته التعليم والشهرة

والفلوس والمجد وبعد ما اعتبرناه رمز وكنا بنحلم به رئيس لمصر يا

صلاح

صلاح: تعالى نشوف برنامج ناسك يا وطن .. البرنامج باللهجة

العامية وبأسلوب بسيط علشان الناس كلها تفهمه .. تعالى نشوف

حلقة البرادعي يا فرح يمكن نلاقى اجابه لسؤال واحد من الأسئلة

ال جوانا كلنا

فرح: يلا بينا يا صلاح هتجنن واعرف مين هو البرادعي !!

(3)

حلقة البرادعي

اهلا بكم

في حلقة انهارده هنتكلم عن الدكتور محمد مصطفى البرادعي الشهير بمحمد البرادعي

الحقيقة الدكتور محمد البرادعي من ناس الوطن الملفتين للنظر جدا والمثيرين لكل انواع الشكوك اللي نتخيلها او لا نتخيلها

في شهر يونيه سنة ٤٢ اتولد الدكتور محمد البرادعي .. وكان وهو طفل عنده طموح واضح من صغره .. ولما كبر ودخل الجامعة كبر حلمه انه يكون في يوم من الأيام حازه كويسه في مجال القانون .. وأصبح بالفعل عالم من علماء العالم المعترف بهم .. لأنه وصل لأعلى درجات المناصب في العلم وحصل على جايزه نوبل .. وحول الجائزة دي كلام كتير هنقله فيما بعد وهل استحقها لعلمه فعلا ولا لأشياء اخرى كما ردد البعض وقتها !!

البرادعي تزوج من السيدة عايدة الكاشف سنة ٧٥ وكانت بتشتغل مدرسة أطفال .. وانجب ولد و بنت .. وعاش حياته معظمها في أوروبا .. وتأثر أيضا بأفكار وعادات وتقاليد الغرب بشكل واضح جدا لدرجه انه على اليوتيوب بعض فيديوهات وصور له هو وأسرته عليها بعض النقد والمحاذير من وجهة نظرنا كشرقيين .. ووصل الأمر بالبعض انهم

نشروا صورته لباسبور ابنة البرادعي ومكتوب انها ملحدة .. وده طبعا
اعتقد انه مش صحيح ولكن الكلام الموجود على اليوتيوب بياكد هذا
الكلام واكثر منه بكثير

ومن الصور والفيديوهات الكثيرة الموجودة بالسوشيال ميديا نقدر
نفهم التطور ال حصل لشخصية البرادعي من انسان بسيط في ملامحه
وملابسه وتصرفاته لإنسان اخر تماما في كل شيء بداية من مظهره
الخارجي حتى قناعاته الشخصية والإنسانية وايضا السياسية

البرادعي حصل على دكتوراه في القانون الدولي من امريكا وكمان
اشتغل في وكالة الطاقة الذرية .. ال دخلها موظف عادي سنة ٨٤
ولكنه وصل لمدير عام الوكالة سنة ٩٧ .. يعنى خلال ١٣ سنة قدر
يصعد لقمة اهم وكالة مسؤولة عن النشاط الذرى بالعالم .. وده ايضا
يحمل علامات استفهام كبيره حول كيفية صعوده ومن كان يقف وراءه
ويدعمه وهل هناك ثمننا دفعه البرادعي لذلك وماهو هذا الثمن؟!
حياه الدكتور البرادعي مليئة بالعلم ومليئة بخلافاته الشخصية
ومليئة بالأمر الغامضة ايضا .. ولكن !!

المهم كلنا بكل تأكيد كنا فخورين بأحد العلماء المصريين إنه
يحصل على جايزه نوبل ويصل لهذه المكانة والقيمة والقامه الدولية
كمدير للطاقة الذرية .. ولكن كان كتير منا مندهشين ومش مستوعبين
ولا مصدقين حكاية حصول البرادعي على نوبل بدون مقابل .. خاصة
انه كان له دور كبير جدا في اقتناع العالم ان صدام حسين يخفى اسلحه
نووية وذريه بالعراق .. وكان اهم اسباب مباركة معظم دول العالم
وموافقتهم على دخول امريكا لبغداد واحتلال العراق ومش بنبالغ
لو قلنا ان البرادعي كان احد اهم الاشخاص المتسببين في دمار العراق
وتشريد شعبها وقتل اكثر من مليون طفل عراقي على مرأى ومسمع

من العالم كله ..

وصور وفيديوهات المآسي ال حصلت بالعراق لا يمكن ان تنسي من
ذاكرة الناس أو التاريخ

ربما لقطه تحطيم تمثال صدام حسين ودخول الدبابات والقوات
العسكرية الأمريكية لبغداد كانت لقطه صادمه للمصريين ولكل
العرب بلا استثناء

ومؤكد وجود البرادعي في مكانته الوظيفية وقتها في وكالة الطاقة
الذرية كان شيء مؤلم لنا كلنا !!..

وده خلى بعض الفنانين والمثقفين وناس كثير انتقدوه في السر في
مجالسهم الخاصة وفي العلقن على صفحات الجرايد وشاشات القنوات
.. زي ما عملت الهام شاهين لما قالتها بمنتهى الصراحة بأحد البرامج
مع عمرو اديب واتهمته بالخيانة والعمالة للغرب على حساب بلده
ووطنه العربي وفيديو حوارها موجود على اليوتيوب لمن يريد .

طبعا كلام الهام شاهين ده كان بعد ثورة يناير .. يعنى بعد فترة
من الوقت وبعد اتضاح كثير من عناصر المؤامرة على العراق خصوصا
وعلى الامه العربية عموما ..

وطبعا الدكتور البرادعي تقبل النقد وقتها على اعتبار انه عاش
في أوروبا اكثر من مصر .. وثقافته غريبه ومفروض يتقبل الرأي والرأي
الاخر رغم انه كلام يصل الى حد التجريح والإهانة اكثر منه نقد او
مجرد رأي !!

ولكن ولأنه شخصية صعب تفهم هو عاوز ايه كان للبرادعي حوار
غريب في موضوع اخر زود الشكوك حوله لما قال في برنامج اخر كلام
مع يسرى فوده انه مش ضد ان المسلم يتزوج مسيحيه .. وكمان مش

ضد ان المسيحي يتزوج مسلمه !!

ايه اللي كان يقصده البرادعي بهذا الكلام خاصة انه سماه اسم
لذيذ وهو الزواج المدني !!

بسبب هذا الكلام لم يهاجمه الفنانين والمثقفين فقط

ولكن هاجمه الشيوخ اياهم بشراسه .. وبغض النظر عن صدق
نواياهم من عدمه في الهجوم عليه لكن سمعنا وقتها احدهم يصف
البرادعي بانه علماني منافق .. وقال عنه شيخ اخر ان الغرب يستخدموه
لمصالحهم وهم في الاساس يحتقرونه لأنه كتب تقارير كاذبه عن
امتلاك بلد عربي وإسلامي للأسلحة النووية والمحرمة دوليا وكانت
هذه التقارير مبررا للأمريكان في غزو العراق ونهب ثرواته حتى اليوم
(نوصل مع بعض لمحطه ثوره يناير))

في البداية كان كل المصريين سعداء بالبرادعي وشايفينه المنقذ لأنه
رجل مدني وعالم له مكانته العالمية وحاصل على نوبل ومعروف لدى
قادة وملوك ورؤساء كل الدول .. وكانت تصريحاته في فينا وقبل عودته
لمصر مبشره وتدعو للتفاؤل ومؤكد معظمنا مازال يتذكر لحظة وصوله
القاهرة في عز الثورة واستقباله كالأبطال بل واعتبره البعض احد اهم
رموز الثورة وراهن معظم الشباب عليه انه سيجعل الشعب المصري
أكثر حريه وديموقراطية وحلموا اننا سننافس اوروبا في هذا المجال
على يد هذا الرجل العائد الى الوطن بكم من الخبرات والعلاقات
والمعارف التي من المؤكد ستفيد مصر وشعبها في كل المجالات

وصور وصوله القاهرة وقتها كانت حديث العالم كله

ولكن وسط هذا الطوفان من الترحيب بالبطل المغوار كان هناك
بعضا من المصريين رافضين لوجوده وحتتهم في ذلك ان للبرادعي رأيا

قاله لعمر و اديب في الرئيس مبارك وكانت كلماته عن مبارك صادمة لكل من سمعها لأنها كانت مدحا في شخصه وشكرا في مواهبه وتمجيذا لعبقريته فمن اين للناس ان تصدق كلام البرادعي السلبي عن مبارك بعدما قال كل هذا المديح له وهو في الحكم !!

المهم انه أثناء الثورة كان البرادعي له صولات وجولات

وكانه المتحدث الرسمي باسم كل المصريين وكان بالفعل اقرب الناس للوصول إلى كرسي الحكم

لكن كان يحصل بعض المواقف الغريبة منه .. فمثلا فجأة تلاقيه موجود في كل الاحداث والمؤتمرات والبرامج الفضائية يتحدث في كل شيء بأسلوبه المعروف وكلماته العربي المختلطة ببعض التعبيرات الإنجليزية ثم فجاء يختفى تماما أو يسافر ويكتفى بكتابة تويتاته الغير مفهومه غالبا كل فتره

المهم ان هذه التويتات كانت محيره جدا للمصريين .. وتصرفات البرادعي عموما كانت في معظمها متناقضة وده خلى فنانة زي سما المصري ورغم التحفظ على معظم فننها اما قدمت أغاني واسكتشات ساخرة منه ومن عدم تحمله المسؤولية واختياره الهروب من المواقف دائما لدرجة انها غنت كلمات رديئة جدا في حقه وهو التزم الصمت ولم يرد او يعلق او يرفض او حتى يغضب خاصة لما غنت بطريقتها الراقصة والاقرب الى الابتذال :

((بردوعه هربت ليه !!))

ومرت الأيام واصطدم الشعب المصري بجماعة الاخوان وانضح استحالة استمرارهم في الحكم وكانت ثوره ٣٠ يونيه

وفوجئ الجميع بعوده قويه للدكتور البرادعي بعدما كان هرب كالعادة الى مقر اقامته بالنمسا ربما خوفا من غدر جماعة الاخوان او تمهيدا لشيء ما يخطط له .. المهم ان هذه العودة جعلت من الدكتور البرادعي نائبا لرئيس الجمهورية .. وتقبله الناس ولكن بكثير من التشكك وعدم الارتياح

التشكك ده زادت نسبته جدا عند معظم الشعب المصري خاصة لما خرج وقتها احد الإعلاميين الأمريكيان واسمه تحديدا اليكس جونز وعرض فيديو قال فيه بصراحه ان البرادعي سيكون أكثر خيانة للشعب المصري

((وكالعادة التزم البرادعي الصمت ولم ينفى او يوضح او يرفض تصريحات هذا الصحفي الأمريكي))

الحقيقة الشعب المصري احتار مع الرجل ده .. واحتار دليله معاه .. وكان لسان حال الناس يبسأل البرادعي .. هل انت وطني وبتحب مصر بجد .. هل انت مصري مخلص وهدفك الخير للمصريين واستقرار الحكم في مصر .. ام هدفك العكس .. هدفك الرئيسي هو انه لا استقرار ولا وجود حكم رشيد داخل مصر .. وكمان عدم وجود حكومة مقبولة من المصريين لان كل تصريحات الدكتور البرادعي كانت دايما تخليك تحس بالقلق وترفض الوضع الراهن املاً في وضع مأمول مش هيجي ابدا .. لأنه لا يشارك اطلاقا في وضع الحلول ولكنه فقط يضع عشرات العراقيل امام أي حل ثم يهرب كالمعتاد !!

واكبر دليل انه فجاه ترك منصبه كنائب لرئيس الجمهورية وسافر بلا عوده .. ومبرره وقتها انه يرفض فض اعتصام رابعه بالقوة رغم ان كل تصريحاته قبلها كانت بتؤكد انه اول من أيد ووافق على استخدام القوة في فض رابعه والنهضة !!

ومؤكد كلنا فاكرين لما الصحفي عبد الرحيم على عرض برنامجه الصندوق الاسود تسريبات صادمه للشعب المصري عموما ولل كان بيؤيد البرادعي خصوصا لان ما عرضه عبدالرحيم على وقتها بالصوت والصورة ووصف البرادعي للمصريين بكلمات بذئنة وغير مقبولة بالمره اقلها كلمة زباله ال قالها عن الشعب المصري اكثر من مره والفيديو مازال موجود على اليوتيوب !!

اعتقد ان الكلمات دي كانت النهاية الحقيقية لمصادقيه البرادعي .. وللأسف كانت نهاية مؤلمه وموجهه لتاريخه ومكانته عند المصريين البسطاء ال صدقوه في بداية الامر !!

الحاجه الوحيدة ال كانت واضحه جدا هي ان كل تصرفات وتصريحات البرادعي كانت متناقضة لدرجه انه وصف معظم من ساندوه ووقفوا معه بداية من حمدين صباحى ونهاية بالشباب ال صدقوه بلفظ لا يمكن حد فينا يتقبله وكان يقوله ببساطه وغرور في نفس الوقت وسمعناه كلنا في أحد التسريبات في مكالمه عجيبه لما وصف كل إل كانوا قريبين منه ويحبوه ويتمنوا وجوده على رأس مصر بكلمة انهم زباله وزبالين .. تخيلوا !!

الحقيقة ان القضية مش الدكتور البرادعي ولا وجوده او عدمه .. ولكن القضية الي كانت فعلا محتاجه سؤال واضح ورد أوضح من البرادعي .. هي انه لو كان مصري ويحب مصر وناسها .. لو كان بجد عنده انتماء لهذا الشعب ويحب المصريين .. كان يجب يصارحنا .. هل كان هدفه الرئيسي لوجوده في يناير ٢٠١١ هو الخير لمصر والمصريين ام كان هدفه هدم نظام مبارك ثم استمرار هذا الهدم .. ونفضل دوله بلا حكومة .. بلا راس ولا استقرار لسبب هو ادرى به !!

بكل بساطه بقول ان الشعب المصري البسيط والطيب مش في احتياج اطلاقا للبرادعي ولا لأمثال البرادعي .. لان مصر ال اخذ منها تعليم مجاني وشهادات وفلوس وجنسيه كانت سبب انه يحقق احلامه الشخصية ويوصل لنوبل مش محتاجه نصايحه ولا تويتاته ال ملهاش أي لازمه !!

((والمتابعون لبعض تويتاته في الفترة الأخيرة يقرأونها على سبيل السخرية ليس اكثر))

مصر وشعبها محتاجين من البرادعي حاجه واحده بس لو لسه عنده اذن تسمع وعقل يفهم وبقايا ضمير يستوعب .. انه يبعد عنهم .. يبعد عن مصر وناسها الطيبين !!

لان المؤكد ان البرادعي صعب يسأل نفسه سؤالنا ال بنساله في كل صفحات كتاب ناسك يا وطن .. وال سألناه في كل حلقات برنامج ناسك يا وطن .. ايه ال انت قدمته لمصر وناسها البسطاء مقابل ما اخذت من تعليم ومال وشهره ومجد لك ولأحفادك يا دكتور البرادعي !!؟

والاهم من ده بنسال البرادعي بصدق .. هتقول ايه لربنا لما يسألك عن دمار العراق وتشريد شعبها .. هتقول ايه لما تواجه مليون طفل عراقي ويسألك بأي ذنب قتلوا وحرقت قلوب امهاتهم !!؟

ثم السؤال الذي لا ننتظر اجابته من البرادعي وامثاله هل كنت تريد لمصر وشعبها نفس المصير .. هل كان هدف وجودك انهاء مصر واضعاف جيشها واذلال شعبها لصالح من يدفعون لك او من يدفعون بك الى منصات نوبل وغيرها !!؟

ثم ثم واخيرا السؤال بعد الاخير للبرادعي ماذا تعرف عن المصريين .. ماذا تعرف عن اكثر من ١٠ مليون عانس وضعفهم عاطل وثلاث

اضعافهم مرضى واربعة اضعاف امثالهم تحت خط الفقر .. اسألك
ماذا تعرف عنهم ولن اسألك ماذا قدمت لهم !!?
ماذا تعرف عن المصريين يا صاحب نوبل !!

(4)

حسان الذي لا نعرفه

اغلقت فرح اللاب توب وهى تنظر مندهشة الى صلاح الذى عاد
من رحلة تخيلاته عن البرادعي على صوت فرح وهى تسال معه
ومع الاجيال الشابة:

فرح: تعرف ايه عن المصريين يا صاحب نوبل

صلاح: للأسف طلع ميعرفش غير مكاسبه ومصلحته وبس

رن الهاتف وكانت والدة فرح تتصل وتسالهما عن موعد حضورهما
لتناول العشاء معها كما وعداها من قبل

ابتسم صلاح وهو يهمس لفرح بعد ان اكدت لوالدها انها فى
الطريق اليها

صلاح: مامتك دي طيبه اوي يا فرح .. لسه بتصدقك لما بتقولي اننا
ف الطريق وانتي لسه ملبستيش اصلا

فرح: ماما طول عمرها بتفكر بقلبها وعمر احساسها ما كذب
عليها

صلاح: عندك حق .. فاكره رايبها كان ايه ف البرادعي وامثاله

فرح: عمرها ما ارتاحتله ولا صدقته رغم انها متعرفش حاجه عنه
غير انه فاز بجائزة نوبل

صلاح: مامتك مصريه اصيله وبفطرتها عارفه مين الكداب ومين

الوطني بإخلاص

فرح: الغريب ان عمرها ما قالت حابه وطلعت غلط

صلاح: الاغرب رايبها في رجل دين كبير زي محمد حسان ال كل
الشباب اعتبروه الطريق للجنه

فرح: كانت بتحب تشوف حلقاته بس مبتجيش مبالغاته في البكاء
والصوت العالي وبتقول انه ممثل كبير لان الدين مقالش كده

صلاح: فكرتيني .. هاتي اللاب توب نشوف حلقة محمد حسان
وانتى بتلبسي

فرح: كده هنتاخر على ماما يا صلاح

صلاح: البسي بس انتي وانا هشوف قال ايه برنامج ناسك يا وطن
عن محمد حسان

فرح: لا خلاص هشوف الحلقة معاك وبعدها اوعدك هلبس ف
دقايق

تفتح فرح اللاب توب وتتابع مع صلاح حلقة محمد حسان الذي
لا نعرفه ولا نعرف عنه الكثير

(5)

حلقة محمد حسان

أهلا بكم

في حلقة أنهارده هنتكلم عن شخصيه دينيه مؤكد له جمهوره العريض جدا وهو محمد بن ابراهيم بن ابراهيم بن حسان .. أو الشيخ محمد حسان ..

اتولد الشيخ محمد حسان يوم ١٨ ابريل سنة ٦٢ .. اسرته بسيطة جدا بقرية ديمو بمحافظة الدقهلية مركز دكرنس تحديدا ..

رباه جده لامه واكتشف فيه النبوغ من صغره .. وانه بيحيد الحفظ ويحب كتب الفقه الصعبة .. فتعمد انه يعلمه ويثقفه دينيا .. وكانت النتيجة انه وهو عنده ١٣ سنة خطب في صلاة الجمعة لأول مره في حياته بقرية اسمها (١٠٠ مجاهد) امام عشرات ومئات المصلين .. ونال استحسانهم وشجوعه انه يخطب كل يوم جمعه .. وبعدها بأسبوع او اثنين فوجئ ان الاف المصلين في انتظاره ..

واختار بذكاء موضوع الخطبة عن الموت وابكت كل المصلين .. وكانت سبب في زيادة شعبيه الشيخ محمد حسان في المنصورة والمراكز والقرى التي حولها ..

وبسرعه كبيره اصبغ له مؤيدين بعشرات الالاف .. واختار يدرس الاعلام علشان يتقن مخاطبة الاخرين وده فاده جدا بعد كده ..

ولما التحق محمد حسان بالجيش مارس هواية الخطابة ايضاً .. لان زي ما قلنا دراسته للإعلام ساعدته بشكل او بأخر انه ازاي يعرف يوصل للناس .. وازاي كمان يوصل رسالته بكل بساطه ..

بعد ما خلص الجيش سافر السعودية زي معظم شباب المنصورة والاقاليم .. وهناك اشتغل في جامعه الامام محمد بن سعود .. واصبح له طريقته واسلوبه في الخطابة في كل مكان .. بحيث انه اصبح من علماء الفقه المشهود لهم .. وتلمذ علي يد علماء السعودية الكبار ..

ولما رجع مصر اصبح له شعبيه كبيره جدا .. ولو فاكرين ايامها كان فيه شرائط الكاسيت كانت منتشرة بشكل كبير .. وكان بيعتبر من اهم شيوخ الناس البسطاء .. او زي ما احنا بنقولها في الميديا او الاعلام .. الشيوخ الشعبين .. بل اصبح من اهم هؤلاء الشيوخ واكثرهم مبيعا سواء كتب او شرايط كاسيت ..

الشيخ محمد حسان زادت شعبيته الحقيقية .. وتأكدت جماهيرته بانطلاق قناه الناس .. بعدما نجح صاحبها عاطف عبدالرشيد ومديرها المخرج المسرحي هاني البنا في اقناعه بتقديم خطبه على شاشة القناه الوليدة وقتها ..

في قناه الناس شافه الجمهور بشكل مختلف .. شاهده الناس صوت وصوره .. بعد ما كانوا بيحضروا له في المساجد والساحات ..

وفجأة اصبح حسان نجم الشباك الاول في الفضائيات المصرية .. لأنه كان حريص انه يخاطب البسطاء بلغه سهله وبسيطة .. ودائماً ما يذكر في كلامه كل ما هو مخيف ومرعب عن الموت وعذاب القبر وغيره ..

وربما ثقافته الريفية وفناعاته الدينية كانت بتساعده علي ده ..
وحتى جماهيره وشعبيته كانت بين هؤلاء الشعبين الطيبين والبسطاء
.. وربما لان هناك من نافسه بقوه بين شباب الطبقة الاجتماعية الأعلى
وهو عمرو خالد ولنا معه وعنه حديث اخر في قادم الايام ..

المهم إن النتيجة كانت ان قناه الناس اصبحت بوجود الشيخ محمد
حسان والشيخ يعقوب والشيخ ابو اسحاق من اشهر القنوات الدينية
وقتها ..

والحقيقة ان قناه الناس فتحت ابواب اخري للشيخ محمد حسان
.. أبواب مكاسب كبيرة وشهرة اكبر .. وايضا أبواب لانتقاده والهجوم
عليه لأول مره ..

فلأول مره يردد البعض ان الشيخ محمد حسان يستفيد من
علاقته بالأنظمة العربية .. وانه كثيرا ما يعمل على خدمة هذه
الأنظمة .. خاصة نظام معمر القذافي في ليبيا .. وتحديددا علاقته بآبنة
معمر القذافي عائشة .. لأنها كانت عامله جمعيه خيريه .. وبالفعل
زارها الشيخ محمد حسان اكثر من مره ودعمها بشكل او باخر .. وال
انتقال وقتها أن ده تذاكي من نظام القذافي .. لانهم تعمدوا يستفيدوا
من جماهيرية الشيخ محمد حسان ..

لكن كان السؤال ايه ال يخلي حسان يصل لمرحله انه يشكر ويمدح
عائشة القذافي وكأنها قديسة ومصلحة اجتماعيه رغم علمه بالظلم الي
كان يمارسه القذافي ونظامه علي الشعب الليبي ..

((وفيديو مدحه لعائشة القذافي موجود على السوشيال ميديا
وكثيرا ما تناقله منتقدوه))

وبعيدا عن علاقه الشيخ محمد حسان بالأنظمة العربية انا شخصا

أثق انه لما عمل ده مع عائشة القذافي مؤكداً كان عنده مبرره .. !!
لكن حدثت مشكله اخري سماها الاعلام وقتها (مشكلة فتاة
فاقوس) الي اتجوزها ابن الشيخ محمد حسان او قالوا ان كان فيه
علاقه بينها وبين ابن الشيخ محمد حسان وانها اتوفت بعد كده
في ظروف غامضة .. والصحافة كتبت عن الموضوع ده كتير .. خاصة
تحقيقات ومقالات زميلنا محمد الباز ولكن تم اغلاق هذا الملف دون
ان نعلم ايه ال حصل بالظبط ..

وكانت المفاجأة ان محمد حسان زوج ابنه بعدها من فتاه اخري
واذاع حفل الزفاف بقناة الرحمة الي بيملكها .. وده حصل لأول و اخر
مره لأنها قناة دينية زي ما كلنا عارفين ..

وربما فرح ابنه ال اذاعه محمد حسان بقناة الرحمة فتح عليه
نوعاً من انواع الهجوم والتساؤل:

من اين لشيخ مثل محمد حسان بكل هذا البذخ !?

ورغم أنها اسئلة مشروعه لكل الصحفيين والمتابعين لمسيرة محمد
حسان .. ولكن الشيخ قالها صريحه لما سألوه عن القصور والسيارات
الفارهة التي يمتلكها فكان رده القاطع:

انا لا امتلك الا سيارة كأميري سياحه !!

ولما كثر الكلام والأسئلة عن القناه واموالها والقصر ال عايش فيه
والزوجة او الزيجات وغير ذلك .. كان رد الشيخ هو الصمت والسكوت
.. ولا شيء غير الصمت والسكوت !!

ومرت السنوات واثناء ثوره يناير ظهر الشيخ محمد حسان بصورة
المنقذ والخائف على الشعب من الفوضى والمناشد للرئيس الاسبق
مبارك انه يتدخل لإيجاد حل للمظاهرات !!

والحقيقة كان موقفه محير جدا .. وكان غير واضح .. هل هو مع الثوار ومطالبهم .. ام هو مع نظام مبارك .. ام له رأي اخر يخاف الاعلان عنه !!

بصراحه مكانش واضح موقفه .. رغم ان كلنا صدقناه وهو في ميدان التحرير يناشد الجميع الحفاظ علي بلدنا .. وصدقنا خوفه لدرجه الرعب علي مصر ..

ومعظنا فاكر لما كان بيروح كل يوم لميدان التحرير علشان يلتقي بالقنوات الفضائية ويتوسل ويصرخ في الناس:

ارجوكم حافظوا علي البلد !!

الحقيقة ال سمعناه من الشيخ محمد حسان في ميدان التحرير وقتها خلي الناس تتذكر علاقته بالرئيس الاسبق مبارك .. وتتذكر حبه وتأيبده له في اكثر من مكان واكثر من مجال .. لدرجة انه لم يعترض اطلاقا على أي قرار او تصرف أو حتى ظلم أو فساد حدث طول فترة حكمه !!

ومعظنا ما زال يذكر كلمات الإشادة والتحية ال كان دايمًا يقولها الشيخ حسان عن الرئيس مبارك شخصيا .. وتتذكر كلمته الشهيرة والموجودة باليوتيوب والسوشيال ميديا حينما قال من على منبر أحد المساجد:

احيي الرئيس مبارك .. احيي

من هنا الرئيس مبارك !!

ونتذكر أيضا اشاداته بالمسؤولين والوزراء والصحفيين .. خاصة لما قام بتحية الصحفي اسامه سرايا وكان وقتها رئيس تحرير الاهرام وقال انه يحيه بالاسم وبيشكره جدا وانه مبسوط بدوره !!

المهم وخلاصة كلامنا عن الشيخ حسان وامثاله من الشيوخ الكبار وأصحاب الشعبية الكبيرة .. اننا جميعا وبلا استثناء نحب من يأخذ بأيدينا للجنة .. ومن يدفعنا لعمل الخير .. لذلك نتوقع منه ومن كل انسان متدين ان يكون قدوتنا في ذلك سرا وعلنا ..

فهل فعلها محمد حسان .. هل فكر في مساعدة الشباب الباحث عن فرصة عمل بشكل واقعى .. هل تبنى مبادرة إنسانية لتزويج اليتيمات وانفق من ماله الخاص علنا أمام الناس ليقصدوا به .. هل ذهب بكاميرات قناته إلى قرية فقيرة من قرى مصر وقام ببناء مستشفى او مدرسه أو مصنعا من جيبه لمساعدة أبناء هذه القرية .. !!

مؤكد لو فعلها الشيخ حسان هو وامثاله من رجال الدين سنرفع له ولهم القبعة حبا واحتراما .. ولاعتبرناهم قدوة حسنة يقلدها جميع الاثرياء والقادريين .. خاصة وانه وأنهم حققوا ثروتهم بإسم الدين .. وباعوا شرائطهم وكتبهم لبسطاء الوطن .. وتاجروا بفقراء الوطن من خلال محاضراتهم وحلقات برامجهم واعلاناتهم .. !!

هل يفعلها حسان قبل فوات الأوان .. ام يظل مقتنعا هو ومن يقتدى به ان هذا ليس دوره وليس ودورهم .. وان عليه وعليهم رفع الشعارات الدينية الجوفاء وسط مصاعب الحياة التي يحيها البسطاء بينما هو وهم في نعيم ثروتهم ينعمون !!

هل يبادر الشيخ محمد حسان بإطلاق مبادرة مجتمعية خيره وعلنيه من ماله الخاص لمساعدة الغلابه والفقراء .. وتكون المبادرة باسمه وتستمر في حياته وبعد مماته .. ام يترك الشعب الفقير الذى احبه وصدقه ووثق به يغنى مع صلاح جاهين:

يا شعب نايم ع الرصيف
وبالمقشة بتتكس
فيك ناس بتشقى ع الرغيف
وناس بتتعب م التنس

(6)

فيفي لا ترقص وحدها

انتهت فرح من ارتداء ملابسها ووقفت امام المرآه تصلح من
مكياجها وشعرها بينما اغلق صلاح الالب توب وهو في حالة ياس
واحباط

صلاح : معقول هما دول رجال الدين في بلدنا

فرح: ماما كان عندها حق وكل كلمه قالتها عن حسان وغيره
كانت صح

صلاح: المشكلة يا فرح ان لسه في ناس كتير بيعتبروا رجال الدين
حالة خاصة ممنوع حد ينتقدهم او يقرب منهم

فرح: انا بصراحة مقدرتش اكمل الحلقة ازاي رجل دين يقسم ان
معندوش ثروة وهو عنده كل الفلوس دي

صلاح: الكارثة انهم بيطلبوا من الشباب التقشف والصبر على انهم
مش عارفين يتجوزوا او يفتحوا بيت

فرح: طبعا وكل شيخ فيهم متجوز ثلاثة واربعه في السر

صلاح: وياريتهم بيتجوزوا ارامل او مطلقات غلابه دول بيتجوزا
بنات في سن اولادهم واحفادهم

فرح تقترب من صلاح بعد ان انتهت من مكياجها وقد بدت
بقوامها الممشوق وشعرها المتدلي على كتفيها كراقصة باليه في غاية

الجمال والرقعة

تجلس بجواره وهي تقول: عارف يا صلاح انا بشوف ان الناس
دول مفيش فرق بينهم وبين الي بيرقصوا في الكباريهات .. كلهم فلوسهم
ومكاسبهم حرام .. بس الفكرة ان كل واحد فيهم بيرقص بطريقته

صلاح : بالعكس يا فرح .. في رقاصين اشرف بكتير من ناس عاملين
فيها شرفاء وهما تجار شعارات

فرح: اه والله عندك حق .. يعني واحده زي فيفي عبده بسمع
انها بتعمل خير كتير وبتصرف على غلابه كتير

صلاح: فكرتيني بفيفي عبده الست دي جدعه جدا وعلى طبيعتها
تعالى نشوف حلقتها مع بعض مش هتاخذ وقت .

فرح: لا يا صلاح احنا كدا اتاخرنا على ماما

صلاح: وهو يفتح اللاب توب: الحلقة اقل من نص ساعة يا فرح
.. عاوز اعرف برنامج ناسك يا وطن قال ايه عن فيفي عبده

تنظر فرح في ساعتها وتجلس بجوار صلاح وهي في حالة استسلام
وشغف لمتابعة الحلقة .

(7)

حلاقة فيفي عبده

اهلا بكم

الحقيقة شخصية السطور التالية مختلفة شكلا ومضمونا .. لان فيها
عبره واستفادة وفيها اجابه غير متوقعه لسؤالنا ال كل مره

بنساله .. هي اخدت ايه من الوطن وأدت ايه للوطن

السيدة عطيات عبد الفتاح .. والمعروفة بإسم فيفي عبده .. عاشت
معظم طفولتها في حي امبابه الشهير بالقاهرة .. وعندها ست اخوات
من والدتها وست اخوات من والدها يعني اسرتها كبيره جدا ..

ومن صغرها وهي عاشقه للرقص الشرقي .. وبدأت تمارس هذه
الهواية وهي عندها ١٢سنه .. لما اتعرفت علي جاره لها في امبابه
واخذتها ترقص معاها في الافراح ومن هنا بدأت انطلاقتها واصبحت
فيما بعد نجمه مصر الاولي في الرقص الشرقي لسنوات طويله

فيفي عبده .. هنتكلم عنها كأنسانه وفنانة وراقصه وايضا كمواطنه
مصريه عندها كل الصفات الجميلة من الجدعنه والشجاعة والقدرة
علي انها تقول كل حاجه بمنتهي الصراحة والوضوح وزى ما يقولوا
الي في قلبها على لسانها

فيفي عبده عندها بنتين هم عزه وهنادي

وهي عندها الشجاعة انها تعترف بكل شيء بمنتهي الصراحة ..

بداية فيفي عبده بالسينما كانت مع ايناس الدغيدي في فيلم امرأة
واحدة لا تكفى .. وبعدها اختارها المخرج محمد فاضل للمشاركة في
مسلسل مازال النيل يجري ..

وبعدها انطلقت فيفي عبده وعملت اكثر من ٢٧ فيلم وشاركت في
مسلسلات كثيره يمكن اشهرها قيامها ببطولة مسلسلات الست اصيله
وازهار وطائر الحب وغيرها

وربما ده خلاها تكون واثقه من نفسها وتتحدى كل الصعاب لأنها
الراقصة الأشهر والاكفأ والانجح وقتها .. لدرجة ان من حبها للرقص
الشرقي كانت بتحلم انها تعلمه في مدارس خاصة داخل وخارج مصر
فيفي عبده لا تخجل اطلاقا انها تقول انا ماتعلمتش في مدارس
.. بل بتعتز بده وبتقول انها سيده مصريه بنت بلد عندها الكفاءة
إنها تواجه اي موقف مهما كان صعب بكل قوة .. ولما وصفتها المذيعة
وفاء الكيلاني انها ست أميه كان رد فيفي عبده قاطع وغاضب وقالت
أنا متعلمه اكثر من أي حد لأني خريجة مدرسه الدنيا !!

فيفي عبده من اكثر نجومات الرقص الشرقي ال اتعرضت للهجوم
الشديد من ناس كثير .. منهم شيوخ .. ومنهم فنانين .. ومنهم صحفيين
.. ومنهم ناس عاديين .. وكانت في كل مره تجد القدرة على الدفاع
عن نفسها وكسب المعركة لصالحها مهما كانت شراسة الهجوم او قوة
الخصم

وكمان فيفي دمها خفيف جدا لدرجة انها لم تعترض على رقص
الرجال رقص شرقي او تقليدهم للراقصات وكانت بترد على الفيديوهات
الي زي دي ببساطه وبروح كوميدية وتقول خليه يتسلوا !!

نجحت فيفي عبده مش بس في السينما والفيديو امّا نجحت كمان في المسرح .. ومحدش يقدر ينسي دورها الجميل والرائع في مسرحية حزمي يا .. ولها اكر من تجربه مسرحيه وفيها الجمهور استمتع برقصها وبتمثيلها العفوي وكمان بالافيهات اللي كانت بتحفظها وتقولها بتلقائيه مش موجوده عند المحترفات او أصحاب الشهادات

علاقة فيفي بزمايلها رائعة ومحبوبه من معظم الفنانين .. لكن علاقتها ب هيفاء وهبي كانت مختلفة .. فكانوا دايمًا يردوا على شائعات انهم مختلفين او متنافسين بالظهور مع بعض في فيديوهات او برامج وهم اخر انسجام .. زي الفيديو الموجود على اليوتيوب وفيفي بتشجع وتعلم هيفا الرقص الشرقي بمرحها وضحكتها وطريقتها المعروفة عنها

فيفي عبده اتجوزت باعترافها ست مرات .. رغم ان الشائعات قالت انهم اكر من كده لكنها حسمت الامر مع طوني خليفه وقالت انهم ٦ مرات فقط .. وده شجاعة تحسب لها لان كثير من الفنانات تزوجن اكر من كده بكثر ودايمًا ما ينكرن ذلك وكأن الزواج عيب أو حرام !!

فيفي ساعات كثير بيختلط معاها الجد بالهزل في احاديثها .. واكيد بتكون قاصده ده لأنها ذكيه جدا وعارفه بتقول ايه كويس وتعرف توصل رسايلها بتلقائيه شديده لكل المشاهدين .. ومؤكد معظمنا تابعها وهى بتقول بعفويه وصدق مقصود في برنامج طوني خليفه: ايوه أنا بأعترف اني اتجوزت عرقي !!

الحقيقة كان أغرب موقف أتعرضت له فيفي عبده في سنواتها الأخيرة لما رشحها أحد الأندية لتكريمها كأمر مثاليه .. وكان هجوم عنيف جدا من كل الصحف ومواقع السوشيال ميديا .. وواجهته فيفي كالعادة بضحكتها وروحها المتفائلة والمتسامحة وكان ردها على أي سؤال في هذا الموضوع هو ابتسامتها وكلمتها الشهيرة خمسه مواه

.. وده قمة الذكاء منها .. حتى مرت سحابه الهجوم ببساطه وتحول الامر الى نكته طريفة يرددها الناس

وبصراحه اختيارها كام مثاليه كان شيء غريب شويه من وجهة نظر البعض .. ولكن من اختاروا تكريمها مؤكد كان عندهم مبرهم .. ومبرهم انها كأنسانه بدأت من الصفر وقدرت تنجح وتحقق ذاتها وتتزوج وتنجب وتربي بناتها .. واتحملت كل مشاكل الحياه لحد ما وصلت بناتها لأفضل مراحل التعليم والاستقرار .. وده يدل على مدى قوة شخصيتها ونجاحها في مهمتها بغض النظر عن مهنتها ..

ومؤكد المجتمع كله وخاصة المجتمع الصحفي ورواد السوشيال ميديا رفض بشده تقبل فكره ان فيفي عبده يتم تكريمها كأم مثاليه .. وهو نفس المجتمع الراض أيضا أنها تعمل موائد رحمن للصائمين في شهر رمضان كل عام .

ورغم أنها أول فنانة وتحديدًا أول راقصه تحرص أنها تعمل موائد رحمن كل رمضان .. الا انه كان لافت للنظر بشده أنها سنة حكم الاخوان ماعملتش مائدة رحمن .. وده على العكس من فنانين كثير بيدعوا احتكار القيم والفضيلة غيروا من جلدتهم وناققوا الاخوان بكل بجاحه اول ما وصلوا للحكم ..

وده يحسب ليفي الست المصرية البسيطة الفاهمة الصح من الخطأ والمدركة للفرق بين المتاجر بالشعارات وبين الوطني والمتمدين بصدق ..

ورغم أن فنانة زي شاكيرًا مثلًا وهي النجمة المعروفة في مجالها بتتبرع سنويًا بملايين الدولارات الا اننا صعب نطلب من فيفي عبده تعمل زيها .. لأنها بكل بساطه بتتكلم وبتتعامل .. وداها بتقول أنا فاتحه بيوت ناس كثير .

وال يعرفوا فيفي عن قرب يقولوا إنها في أعمال الخير مبتتاخرش
عن مساعدة أي حد محتاج المساعدة سواء تعرفه أو متعرفوش .. وانها
انسانه نقيه وبتحب تعمل الخير بصدق ..

وفيفي عبده البسيطة وال مدخلتش مدارس وبعد ما نجحت
كممثلة وعملت بطولات اعمال فنيه كثير .. اقتحمت بكل جرأة مجال
تقديم البرامج و ده شيء يحسب ليها لأنها ببساطه سيده أميه وعصامية
وبدأت حياتها من تحت الصفر .. وتعبت علشان تصنع اسمها مهما
كان التحفظ على مهنتها كراقصه .

مهنتها التي يلعبها معظمنا في العلن ويتابعها في السر ..

وعموما سواء اتفقنا او اختلفنا على فن فيفي عبده الا اننا لا
ننكر أنها لم تأخذ شيئا من الوطن مثل غيرها .. فلا تعليم بمدارس ولا
عمل او منصب حكومي ولا رعاية بمستشفيات الدولة .. ولا أي شيء ..
وبالعكس فقد أعطت وساعدت قدر استطاعتها كل محتاج مر بحياتها
.. سواء من اسرتها او معارفها او العاملين معها ..

وكثيرا ما قرأنا عن افعالها الخيرية من تبرعات وموائد الرحمن
وغيرها وهى الراقصة المرفوضة من مجتمعنا الذي يجد أموال تجار
الشعارات الدينية والوطنية ومكاسبهم لا نفسهم حلالا .. بينما تبرعات
فيفي عبده للغلبة حراما ..

رغم ان الحقيقة الواضحة كالشمس هي ان الجميع يرقص مثلها
وربما تفوق عليها باختلاف أدوات الرقص .

فيفي عبده كانت وستظل راقصة رقصت وكسبت في العلن ولم
تخدعنا بكلمات جوفاء او شعارات كاذبه .. فلم نعرفها بصورة غير
صورتها .. في الوقت الذي عرفنا عشرات غيرها وشاهدناهم يرقصون

بألف صورة والـف وـجـه .. وـيـحـقـقـون المـلـايـين كل يـوم عـلى حـسـاب
الـوطـن وبـسـطـاء الـوطـن !!

(8)

الزعيم

طبع صلاح قبله على جبين زوجته فرح قبل خروجهما من شقتهما
بينما هي تتحدث مع والدتها في المحمول:

فرح: سوري يا ماما .. خلاص بجد انا وصلاح نزلنا خلاص .. والله
المرّة دي مش بكذب عليكي .. مسافة الطريق هنكون عندك .. باي

صلاح حاملا اللاب توب ينزل السلم وخلفه فرح بعد أن اغلقت
باب الشقة

صلاح: اتاخرنا فعلا على ماما يا فرح .. مكانش لازم نضيع وقت ف
حلقة فيفي عبده

فرح: عجبنتي اوى الست دي .. متصالحة مع نفسها بصراحه

صلاح: وواضحة مش زي ناس كتير لابسين الف قناع

فرح: كويس انك جبت اللاب توب معنا نشوف باقي الحلقات
عند ماما

صلاح: اول ماهنركب الميكروباص هفتح ونشوف شخصيه مهمه

جدا .. هتجنن وأعرف عمل ايه لناس الوطن

فرح: انت اتجننت يا صلاح .. والناس ال راكبين معنا هيسمحو
اننا نزعجهم بالحوار ده

صلاح: الناس كلها عاوزه تعرف يا فرح .. لان الشخصية دي مش
أي حد

فرح: تقصد مين يا صلاح

صلاح: اقصد شخصية كلنا بنحبها .. بس مهم نعرف ادى ايه للوطن
وناسه بعد ما اخد كل حاجه .. التعليم والشهرة والفلوس والمجد وكل
حاجه

فرح: شوقتني أعرف مين ده يا صلاح

صلاح: الزعيم يا فرح .. عادل إمام !!

(9)

حلقة عادل امام

اهلا بكم

زي ما تعودنا مع بعض كل يوم هنا نقش مع بعض وهنقول مين هم ناس الوطن وايه دور كل حد فينا في بناء أو هدم هذا الوطن نجم حلقة النهارده هو نجم بمعنى الكلمة لأنه كسر كل القواعد المتعارف عليها من وسامه او شكل او غيره في موضوع النجومية ..

اتولد سنة ٤٠ من القرن الماضي في المنصورة وعاش معظم طفولته في حي السيدة زينب ووالده كان موظف في مصنع حكومي ..

وفي بداياته واول ما التحق بالجامعة راح على طول على فريق التمثيل .. ومن اول يوم ظهر انه خفيف الظل وكل زمايله حبه جدا

(وزي ما قال في السبعينيات في لقاء نادر مع المذيعة أماني ناشد : انا المفروض مهندس زراعي .. لكن مشتغلتش ولا يوم مهندس زراعي .. معرفش اشتغل مهندس زراعي .. واتخرجت من كلية الزراعة ممثل ما اتخرجتش مهندس يعني اتخرجت ممثل زراعي)

كانت بدايته الحقيقية لما اخده الفنان فؤاد المهندس في مسرحية انا وهو وهي

ومع اول ظهور لفت نظر الناس بشده .. وكان دوره صغير .. لكنه مع الوقت كان كل يوم يجتهد ويضيف ويكبر الدور .. لحد ما اصبح

دور مهم في المسرحية

نجم حلقة انهارده الزعيم عادل امام

وزي ما قولنا ظهر من اول جمله ومن اول افيه .. وموضوع افيهاته شرحه يطول .. لان معظم كلمات عادل امام في مسرحياته الناس اخذتها كأنها مثل شعبي او حكمة رغم أنها نكتة او افيه بيضحك الجمهور .. عادل امام تزوج السيدة هاله الشلقاني .. ولزواجهم قصة طريفة حكوها زمان مع الصحفي مفيد فوزي ..

قالت هاله الشلقاني انها لما راحت تشاهد مسرحية مدرسة المشاغبين وحببت تسلم على ابطال المسرحية في الكواليس كان عادل امام الوحيد في زمايله الي ماعاكسهاش !!

اما عادل امام قال عن اول مره شاف زوجته: كنا قاعدين في غرفة المنتج سمير خفاجى بالمسرح .. وفجأة لقينا شباك اتفتح وخرجت شيء له حضور ومبهج كده .. وكل الي حوالها بدأوا يعاكسوها .. انا الوحيد الي محاولتش اعاكسها .. لأني مبعرفش اعاكس اساسا !!

وطبعا كل حوارات عادل امام دمها خفيف لأنه يمزج الجد بالهزل ويخلق حالة من البهجة في كل برنامج يكون ضيفه ..

وكلنا عارفين أولاد الزعيم عادل امام وهم المخرج المعروف رامي امام والممثل الموهوب محمد امام

وايضا ساره امام ال اتجوزت ابن المهندس نبيل مقبل وقالوا انه من قيادات الاخوان زمان .. وده اتحسب على عادل امام .. لأنه في عز عصر مبارك زوج ابنته لاحد ابناء كوادر الاخوان دون اي حسابات اخرى ..

وصور وفيديوهات كتب الكتاب مازالت موجوده على اليوتيوب
بكل ما فيها من قفشات الزعيم مع الشيخ سيد طنطاوي رحمه الله
خاصة لما قاله: ممكن ارجع في كلامي !!

وذكاء عادل امام واضح بشده في مشواره الفني لأنه نجح في سبعينات
القرن الماضي انه يجمع حواليه نخبه من الصحفيين والكتاب والمثقفين
.. وربما عمل ده تقليد منه لذكاء عبدالحليم حافظ الاجتماعي والفني
.. وانه اتعلم ازاى يحط نفسه على بداية الطريق الصحيح للنجومية ..

ونجح بالفعل في ده لما حقق اعلى ايراد في السينما سنة ٧٩ في فيلم
(رجب فوق صفيح ساخن)

واستمر من وقتها هو النجم الاشهر والاكبر في عالم السينما لسنوات
طويله جدا

وربما النقد الي وجه لعادل امام كان نقد طريف جدا .. لان معظم
المتابعين لأفلامه لاحظوا حاجه غريبه .. ان مفيش بطله من بطلات
افلامه لم يحدث بينهم قبله .. او بمعنى اخر قالوا انه بيكون حريص
على وجود مشهد قبله بينه وبين بطلة افلامه .. زي معظم افلام الفترة
دي ..

وده ال خلى مخرج زي خالد يوسف يعلق على رفض عادل إمام
لبنته انها تمثل ويقول: ماترضاه لنفسك ارضاه للأخرين .. مينفعش انا
كممثل ابوس فنانه في فيلم وبعدين اقول انا ماارضاش ده لبنتي !!..

وفيديو كلام خالد يوسف ولقطات افلام عادل إمام موجوده
باليوتيوب وما اكثرها لأنه عمل عشرات الأفلام مع معظم نجومات
السينما وقتها ..

وبعيدا عن موضوع القبلات ال اكيد له مبرره الدرامي حتى لو

رفضناه كمشاهدين .. لاحظنا اهتمام عادل امام بفكرة خلط السياسة بالدين .. وانتقاده الشديد الفكرة دي طوال فترة حكم الرئيس الاسبغ مبارك .. ورفضه لظاهرة تدخل الدين في السياسة .. وعمل افلام محدش يقدر ينساها خاصة افلامه مع الكاتب وحيد حامد .. وكان بصراحه بينقل نبض معظم الناس بكل صدق .. وده يمكن ال نجحه بشكل او بآخر وصنع منه فنان للشعب زي ما هو حابب دايما يقول على نفسه ..

الا ان البعض اتهمه انه حاول يكون فنان السلطة .. خاصة أن بعض افلامه ال نجحت وكسرت الدنيا كانت بتتبنى وجهة نظر النظام وقتها. وبعدها قدم مسرحية الزعيم .. وكانت فكرة جريئة جدا انه هو يمثل دور الزعيم ويقول افيهات كلنا ضحكنا عليها .. حتى ان بعض الزعماء العرب كانوا بيجوا مصر مخصوص ويتفرجوا عليها .. وبعضهم كان رافضها شكلا وموضوعا .. ورافض جرأة التعليقات ال بيقولها عادل إمام وفيها إسقاط واضح على الحكام والزعماء العرب وقتها ..

والحقيقة ان فكرة وعرض مسرحية الزعيم تحسب لعصر مبارك من ناحية ممارسة الحرية بشكل او بآخر لان كان فيها جمل كتير بتضحكنا لكنها صعب تعرض الا بوجود فنان في حجم عادل إمام وبحكم علاقته بالسلطة ..

وده خلى فنان زي فاروق الفيشاوي يقول بوضوح وصراحه على عادل امام انه فنان السلطة لما سألوه هل تعتبر عادل إمام فنان النظام السابق !!

وعلى فكره ده كان رأى ناس كتير والطريف ان الزعيم لم ينكر ابدًا علاقته بالسلطة سواء في مصر او خارجها خاصة انه كان صديق شخصي لكتير من الزعماء العرب وحظى بالترقيم من بعضهم وكانوا بيتعاملوا

معه معاملة خاصة تليق بمكانته الفنية الكبيرة ..

وبعد ثوره يناير كان لعادل امام مواقف مهمه جدا تحسب له ..
لأنه طلع في بدايات الثورة بكل جرأه وشجاعة واحساس بالمسؤولية
وقال:

ليه بتشتموا مبارك .. هو عملكوا ايه علشان تشتموه !!

وكان بيقولها بكل جديه وصدق ..

ولعادل إمام موقف شهير وطريف عمله على الهوا لما نام وسمعنا
صوت شخيره اثناء كلام أحد المسؤولين .. وهو ما فهمه الناس انه اما
احتجاج على مضمون كلام المسؤول او رفضا للاهتمام بأي حد مهما
كان طالما هو الضيف ونجم الحلقة !!

وكثيره هي المواقف التي تؤخذ على عادل إمام سواء اتفقنا أو
اختلفنا عليها .. مثل ما تردد حول علاقته بزملائه وقت مرضهم بداية
من سمير خفاجى ومرورا بمصطفى متولى وسعيد صلاح واحمد ذكى
ونهاية بمحمود ياسين ..

وعموما كل هذه الأمور مش موضوعنا ..

وكل ما يهمنا في برنامج ناسك يا وطن اننا بنسال عادل إمام
كنجم اوحد للسينما وللفن المصري لا كتر من ربع قرن .. عملت ايه
للمصريين يا زعيم .. عملت ايه للمصريين البسطاء ال كانوا سبب في
نجاحك وشهرتك وايضا ثروتك .. عملت ايه بشكل واقعى للمصريين
خاصة انك تعلم جيدا مشاكلهم الحياتية والاجتماعية .. وتعلم مشاكل
القرى والاحياء الفقيرة والمناطق العشوائية .. وال بتعاني نقص شديد في
كل الخدمات .. ومؤكد تعلم ان ديون مصر تزيد عن ٢٣٠ مليار زي ما
بتقول الأرقام المنشورة ..

واكيد عارف ان مصر مرت بتجربة صعبه وبتعاني مشاكل اقتصادية
ضخمه .. خاصة أنه تم اختيارك سفيرا للنوايا الحسنة أكثر من مره ..
ونسأل ونعيد السؤال بحب للزعيم عادل امام .. عملت ايه
للمصريين بعد ما اخدت كل شيء .. اخدت من مصر كثير .. لأنك
تعليم واتعلمت مجانا حتى المرحلة الجامعية .. نجوميه واصبحت
النجم الاوحد .. فلوس واخدت كثير لدرجة انه اتقال انك في إعلان ٣٠
ثانيه اخدت ٤ مليون دولار .. وده الي اتقال واتنشر في معظم الجرايد
والمواقع .. وكمان اشترط ان التصوير كله يخلص في يوم واحد .. يعني
٤ مليون دولار في يوم ..

مؤكد محدش من المصريين ضد انك تأخذ وتكسب وتنجح اكثر
واكثر لأنك في النهاية رمز فنى للمصريين جميعا .. ولكن ال للمصريين
عندك انك تمد يد المساعدة ليهم .. انا بقولها بصدق كصحفي مصري
.. احنا في مرحله محتاجين نمد يد المساعدة لبعض .. محتاجين الفقير
يحس ان الغني والناجح والمشهور والمسؤول حاسس بيه ..

وتعالوا نحسبها .. لو عادل إمام ذهب بكل نجوميته لأي قريه
فقيرة في الصعيد وعمل فيها مستشفى أو جامعه أو مدرسة أو أي
مشروع استثماري من ماله الخاص .. مؤكد ساعتها هيتضاعف حب
الناس له عشرات الاضعاف ..

حقيقي ليه لا وهو قادر يعمل ده بمساعدة اصحابه واصدقاءه
ومعارفه وجمهوره .. ومش هفكره ان كل نجوم العالم بيعملوا ده ..
واخرهم براد بيت لما اتبرع ب ٤٨ مليون دولار لمجتمعات اللاجئيين في
اماكن مش في بلده ..

ومنتهى الأمانة والبساطة .. البسطاء والغلابه محتاجين من عادل
امام ومن كل نجوم مصر مد يد المساعدة بصدق وبحب .. زي ما

مصر ادتك حب وشهره ونجاح وجماهيرية .. مصر محتاجه ايدك
ومساعدتك في العلقن وعلى الهواء علشان الناس القادرين يقلدوك ..
وارجو ان كلامي مايكونش فيه شيء يزعل .. لأننا كلنا محتاجين
تقول لبعض كفاية فقر وجهل وعشوائيات .. كفاية اطفال شوارع ..
كفاية أمراض اجتماعيه كتيره من تعليم وصحة وغيره ..
تعالوا بجد نمد يد المساعدة لناس الوطن بحب وبالفعال مش
بالكلام او الشعارات ..

وارجو ان رسالتي لعادل امام ولكل نجوم العالم العربي تكون
واصله وواضحة .. والا مش هيكون اداثنا غير اننا بنتفرج على فن
عادل امام واحنا بنبكي وبنضحك وبنقول مع صلاح جاهين:

يا شعب نايم ع الرصيف

وبالمقشه بتتكس

فيك ناس بتشقى ع الرغيف

وناس بتتعب م التنس

(10)

عمرو اديب

مع انتهاء حلقة عادل امام على الالاب توب فوجئ فرح وصلاح
بالسائق وجميع الركاب حولهما يتابعون ومندهشون ويرددون نفس
بيت الشعر الشهير بالبرنامج

يا شعب نايم ع الرصيف

وبالمقشة بتتكس

فيك ناس بتشقى ع الرغيف

وناس بتتعب م التنس

قال السائق: والله حرام .. الناس دي مش حاسين بينا خالص

وقال راكب: احنا الشعب واحنا السبب في ملايينهم وشهرتهم

وقال راكب اخر: انا لو ادوني ربع فلوسهم هممثل احسن منهم

وعلق راكب ثالث: يا عم يدوني الف جنيه وانا اناام ف الاستديو

وهنا قال السائق في يأس: شوفتوا كلكم فكرتوا في نفسكم وبس

زيهم بالظبط .. محدش فيكم قال هعمل حاجه لبلدنا وناسها الطيبين

تركهم صلاح وفرح واتخذا طريقهما لشقة مامة فرح التي لم

تتوقف عن الاتصال بهما ..

بينما راح السائق والركاب يواصلون الحوار المليء بالجدية وان كان

مغلّفا بنوع من أنواع المزح والسخرية ..

وبصالون شقتها جلست والدة فرح معهما تضحك وهى تستمع
لما حدث ..

وفجأة قررت معاقبتهما بتأجيل تناول الطعام الى ما بعد مشاهدتها
حلقة من البرنامج ..

وضحكت فرح وسألتها عن الشخصية التي تحب أن تعرف عنها
ماذا اخدت من الوطن وماذا قدمت له ..

لم تفكر الأم طويلا بل طلبت مشاهدة حلقة عمرو اديب الذي تراه
وتتبعه بإعجاب وهو ينتقل بين القنوات بأعلى أجر وتتمنى أن تسمع
عنه انه يدعم ويساعد أبناء وطنه البسطاء من ماله الخاص وبحب
وصدق كما يقول ويردد دائما على الهواء ..

وكان لها ما ارادت .. بدأوا جميعا يتابعون ماذا قال برنامج ناسك
يا وطن عن عمرو عبد الحى اديب !!

(11)

عمرو اديب الذي نعرفه

اهلا بكم

هنستعرض مع بعض مشوار اخذ وعطاء عمرو عبدالحى اديب
من وللوطن بمنتهى الحياء

الاعلامى عمرو اديب معروف عنه انه كسر قاعدة المذيع الوسيم
وانه كان لا يمكن فى بداياته يتخيل لو للحظة انه ممكن يكون نجم
فى مجاله ..

ورغم أنه درس اعلام إنما الأهم انه بطبيعته واسلوب تربيته جمع
ما بين الرفاهية والشعبية .. لأنه ابن السيناريست المعروف عبد الحى
اديب وشقيق الاعلامى الأشهر والاكبر عماد اديب .. ولكنه من صغره
كان يحب يروح قصور الثقافة فى حى المنيرة القريب من بيتهم
فى شارع عبدالخالق ثروت .. وبيقابل أصحابه على المقاهى .. يعنى
اكتسب خبرة التعامل مع ولاد البلد الشعبين البسطاء .. والتعامل مع
الطبقة الارستقراطية ال هو منها ..

والحقيقة انه قبل ما يتجه للإعلام جرب وحاول يكون ممثل .. وفى
رأى الشخصى لو كمل فى التمثيل كان حقق نجاح ملحوظ .. لأنه شارك
بالفعل فى أحد الأفلام تقريبا اسمه عيون الصقر .. وله مشهد شهير
وموجود على اليوتيوب وكان أدائه معقول .

عمرو اديب أحيانا لا يجيد اختيار الفاظه .. وربما يتعمد انه

يتجاوز في هذه الالفاظ واحيانا في الحركات .. زي ما شوفناه بيشتتم مبارك وأولاده والاخوان بأبشع الشتائم على الهوا ..

ولكن في المجمل الناس حبت عمرو اديب بتزكيتته زي ماهي .. وجمهوره بيتقبل تصرفاته لانهم بيحسو انه واحد منهم .. وانه ابن بلد زيهم وبيحس بيهم ومشاكلهم .. ولما بيعمل حملات خيرية بتنجح جدا وبيجمع الملايين لأنه بيمتلك ادوات إقناع وتشجيع الناس على التبرع على الهوا .. وبيتجسد في شخصية اخرى كأنه فعلا بيمثل دوره كمذيع ياتقان ..

عمرو اديب اتعرض للظلم قبل ثورة يناير .. والسبب انه كان احيانا بيخرج عن النص ..

وعلاقته بالنظام الاسبق نظام الرئيس مبارك كانت علاقة غريبة .. لأنه رغم الظلم ال اتعرض له زي ما قال .. كان يمدح وبيشكر في مبارك بشكل واضح وبدون اي تمويه او مواربة .. لدرجة انه في احد البرامج قال كلام كالشعر في افضال وعبقرية الرئيس مبارك ..

ومع بداية ثورة ٢٥ يناير فضل يشكر في الرئيس مبارك ونظامه واستمر يوصفه انه الاب وانه بيقدر وبيحترم دور الاعلاميين .. وكثير من الكلام ده ..

وفجأة وبلا أي مقدمات ..

فوجئ الجميع يوم التنحي بعمرو اديب يتخذ موقف عنيف وغازب بقوة ضد الرئيس مبارك .. لدرجة انه انفعل انفعال شديد جدا وهو يقول كلمات قاسية موجهه لنفسه وللمشاهدين .. بسبب المرار الي عاشه اثناء نظام الرئيس مبارك .. ووصف الجميع بأقسي واصعب العبارات لما قال:

احنا كنا في حالة ذل .. لا يمكن هيجي اسوأ من الي احنا كنا فيه ..
لا يمكن يجي ذل ومهانة قد ال احنا كنا فيها .. كانت الناس بتضرب
في الاقسام قدام مراتهم وأمهاتهم بالجزم .. احنا كنا في عصر اسود
ومهبب !!

واضاف عمرو:

خلوني اتكلم واقول انا عايز اتكلم عن نفسي لان الفترة الي فاتت
ماكنتش عارف اتكلم .. امي قالتلي يا عمرو نفسي اشوفك في التلفزيون
.. مره واحده بس تطلع على التلفزيون اشوفك .. وكانت عيانه وفي
المستشفى كان نفسي اطلع بس يوم اقولها ياما دعاكي في الصبح وفي
الفجر جه بنتيجة ..

وقال عن شباب الثورة وقتها:

العيال ال طلعاو ف الثورة احسن مننا .. احنا جبناء .. احنا ماكانش
عندنا قدرة اننا نعمل زيهم

واضاف عن مبارك:

كان بيكلم كل البرامج ع الهوا .. مفيش برنامج منكش بيكلمه ..
وكنت بقول لازم الناس تعرف الحقيقة وكنت واهم .. لأنني ماكنتش
متخيل انهم ممكن يعملوا فينا كده .. يسكتوا بلد كامله ويخرسوا
شعب بأكملة .. دول مكانوش بيعرفوا ربنا !!

بكل هذا الغضب والحماس وكل هذه الدموع قابل عمرو اديب
لحظة تنحي مبارك ..

والحقيقة تميز عمرو اديب انه طول الوقت كان يحاول يكون مع
الناس .. ويحاول دفع رجال الاعمال والقادرين للتبرع والمساعدة في
أعمال الخير .. وفي معظم الحالات بيكون هو شخصيا اول المساهمين ..

ويمكن بعضنا يتذكر كلماته على الهواء في حملته لجمع البطاطين
لما قال:

انا قعدت اسبوع ألم فلوس البطاطين علشان اجيب ٥٠ مليون ..
انتم انهارده عملتوا رقم قياسي جديد ٦٠ مليون جنيه في طلعه واحده
في ساعتين .. بشكر اخواتنا في السعودية والكويت والإمارات والمصريين
ورجال الأعمال .. بشكر كل الناس ال اتبرعوا كل واحد باسمه ..

ولكن أثناء الثورة ومن قلب ميدان التحرير فوجئنا بالفنان احمد
حلمي ببوجه رساله لعمرى اديب ويقله كلام محدش فهم معناه
وقتها وان كان عمرو أديب اكيد فاهم يقصد ايه لأن أحمد حلمي
قاله بشكل مباشر:

يا عمرو سلملي على الإعلام الفاسد .. وخصوصاً عمرو أديب ..
وعايز اقله كلمه ان مفيش حد بيتفرج على فيلم وحش مرتين ..
ومفيش حد بيكمل فيلم وحش لحد الآخر !!..
ومؤكد عمرو وقتها كان فاهم حلمي يقصد ايه ..

بعد وصول الإخوان للحكم كان موقف عمرو اديب واضح وجريئ ..
وقالها صريحه انه ضد أسلمة السياسة أو تدخل الدين في السياسة ..
وقال للإخوان وحكامهم كلمات وصلت إلى حد التجريح لما وجه كلامه
لمرسى وقاله انت فاشل وكلنا فاشلين .. وقال:

مصر كبيره اوي عليك يا سيادة الرئيس .. مصر كبيره عليكم اوي ..
مادام مش قادرين تحكموا قاعدين ليه .. قاعد تقول النظام السابق
النظام السابق .. طب النظام السابق عمل مصايب .. وانت بتعمل زيه
.. النظام السابق كان بيطنش وانت بردوا بتطنش .. النظام السابق كان
فاشل وانت بردوا فاشل .. كلنا فشله وانا كمان فاشل كلنا فاشلين .

وال عارفين عمرو أديب عارفينه عفوي وعلى طبيعته .. يعنى لما تقابله على أي كافيه في أي مكان هتلاقيه بيدخن الشيشة عادى ومعندوش اي مشكلة .. وكمان له صورة شهيرة موجودة على مواقع الإنترنت وهو قاعد على المسرح بشكل لا يليق بمذيع في مكانته أثناء رقص هيفاء وهبي .. ومحدث عارف في أي مناسبة اتصور الصورة دي .. لكن هو ده عمرو اديب ال بيتصرف بطبيعته وبتلقائيه شديدة .

وربما يكون عمرو اديب من الشخصيات المثيرة للجدل وده ببيان بوضوح على صفحات اليوتيوب والسوشيال ميديا ..

مجرد ما بتكتب اسمه بتلاقي كل حاجه عنه سواء معاه او ضده .. والحقيقة هو بيتقبل النقد وحتى التجريح بصدر رحب ويعتبر ان ده جزء من عمله .. ومعندوش في ده اي مشكله .. وانا واثق ان كلامنا عنه النهارده ممكن يتقبله بكل سهولة عكس شخصيات اخرى زعلت منا لما انتقدناهم للصالح العام .. ويساعده على ده ثقافته واحتكاكه وانه من اسره اساسا اعلاميه وفنية ففاهم ومدرك لدور الاعلام بشكل أو بآخر ..

وعمره اديب بحركاته والفاظه واسلوبه فرض نفسه وبقي رقم صعب في المعادلة الاعلامية .. وكلنا بنحترم طريقته واسلوبه وايضا بنحترم اجتهاده ..

والحقيقة في برنامجنا ناسك يا وطن انا بحيي وبفرح جدا بكل انسان مشهور وثري يمد يد المساعدة لناس الوطن ..

والحقيقة انا بسأل عمرو اديب ال محاولاته لمساعدة البسطاء موجوده .. لكن هل هي موجوده بحجم وجودك .. حملة المليون بطانية مثلا بترضي ضميرك وتقول لنفسك كفاية كده .. وحاسس انك اديت دورك الاجتماعي والاعلامي والإنساني !!..

بمعنى أدق هل عمرو أديب لا يستطيع عمل حملات خيريته أكبر وأقوى وأفضل من كذا .. خاصة أنه يشغل دائماً في أكبر القنوات وبأعلى أجر !!؟

مؤكد في إمكان عمرو اديب تقديم خدمات للغلبة أفضل مليون مره .. لأنه يمتلك قدرات هائلة في اقناع الاثرياء داخل وخارج مصر بالتبرع .. وكلنا لسه فاكرين كلماته وحركاته على الهوا وكأنه في مزاد وفاكرينه لما قال:

امبارح كنا بتتكلم في ١٥٠ الف بطانيه .. صحينا النهاردة لقينا عندنا ٢٠٠ الف بطانيه ..

وامبارح ناس كتير قالو انت مجنون .. يعني ايه مليون بطانيه في ٥٠ جنيه ب ٥٠ مليون .. لكن النهاردة اتصل بيا سفير دولة الإمارات وقالي أن حكومة الإمارات داخله معنا في الحملة ب ١٢ مليون جنيه .. يعني كده معنا ٢٤٠ الف بطانية كمان يعني معنا تقريبا ٢٥ مليون جنيه في ليلة .

هو دا عمرو أديب بالظبط عنده القدرة على إقناع الناس وأنه يتكلم بشكل واضح وصادق ويحث الناس على فعل الخير ..

لكن مشاكلنا الاجتماعية ال ورثناها من سنوات فساد طويله اكبر من البطانية يا عمرو .. مشاكلنا في التعليم والصحة والسكن والبطالة والعنوسة وغيرها

مشاكلنا كبيره ومهمتنا نواجهها بقوة وحسم .. وانا دائماً بقول أن الإعلام هو الحل .. والحل في الإعلام اننا نحث الناس على فعل الخير والمساعدة وتقديم العمل الاجتماعي على أي مصلحة شخصية .. ولو عمرو أديب عمل فقرة ثابتة لعمل الخير واختار موضوع او

قضية اجتماعيه عالجهما .. اثق تمام الثقة انه هينجح وهيساهم في حلها بسهولة .. لأن الشعب المصري منتظر منا كإعلاميين وصحفيين وفنانين ولاعبين .. وكنجوم في السياسة والفن والدين والرياضة وغيرها من المجالات .. تقديم يد المساعدة الحقيقية لناس الوطن بالفعل مش بالكلام ..

لو عملنا ده بإخلاص مقابل ما اخدناه من تعليم وشهره وفلوس ومكانة اجتماعيه مميزه .. هنكون أدينا دورنا المفروض علينا ..
اما لو تكاسلنا وفضلنا كل واحد يبحث عن مكاسبه الشخصية وخلص .. فقل على الدنيا السلام وغنى مع صلاح جاهين:

يا شعب نايم ع الرصيف

وبالمقشة بنتكنس

فيك ناس بتشقى ع الرغيف

وناس بتتعب م التنس .

(12)

لميس والإخوان

انتهت حلقة عمرو اديب لتنظر فرح حولها فتجد زوجها صلاح
قد اسند رأسه للخلف واغمض عينيه بينما والدتها ذهبت للمطبخ
لتعد لهم الطعام

تركت فرح زوجها على حاله ودخلت غرفتها القديمة تستعيد بعضا
من ذكريات طفولتها وصابها ..

صورها والعايبها مازالت كماهي ودبدوبها الكبير الذي اهداها لها
والدها قبل رحيله .. وكثيرا ما احتضنته وتحدثت معه حول صدمتها
يوم غاب والدها بشكل مفاجئ .. فقد كانت تحبه كثيرا ..

جلست فرح على سريرها الصغير واحتضنت صورة والدها وانهمرت
دموعها الصامتة وقالت له بصوت مخنوق:

كنت محتاجك يا بابا .. محتاجك تفهمني الدنيا اكثر .. تفهمني مين
فينا الغلط .. احنا الشباب البريء ال بيحلم بحياة افضل لكل الناس ..
ولا هم ال بيتاجروا بينا وبأحلامنا وعندهم الف مبرر لتصرفاتهم ..ليه
سيبتني ومشيت يا بابا ..

فوجئت فرح بيد والدتها تربط على كتفها في حنان واضح ..
وضمتها الأم بشده وكأنها تطمئننها .. بينما تماسكت فرح وهي تمسح
دموعها وقالت:

فرح: مش عارفه ليه اول ما بدخل اوضتى دي بحس اني هموت

من الجوع يا ماما

الأم: والسفرة جاهزة يا قلب ماما .. عملتك الحمام ال بتحببته انتي
وجوزك صلاح

وهنا يأتي صوت زوجها من الخارج:

صلاح: انا هبدا آكل مش قادر اصبر خلاص

فرح: يلا يا ماما صلاح مفجوع وممكن يأكل السفره كلها

الأم: بألف هنا يا بنتي بس ممكن اطلب منك حاجه واحنا بناكل

فرح: عيوني يا ماما .. اطلبي روعي ترخص علشانك

الأم: عاوزه اشوف حلقة لميس الحديدي واعرف قال ايه برنامج

ناسك يا وطن عنها

فرح: بس كده .. يلا بينا يا ست الكل .. هنشوفها كلنا مع بعض

على السفره

(13)

حلقة لميس الحديدي

اهلا بكم

ومن ناس الوطن أيضا الإعلامية لميس الحديدي .. الحقيقة لما نتكلم عن لميس الحديدي هنتكلم بكل حيادية وبكل شفافية وبكل صداقيه زي ما أحنا متعودين .. لميس الحديدي أتولدت يوم ١٩٦٩/١١/٧ وده الي ناشره معظم مواقع الانترنت .. وهي من أسره اعلاميه متميزة ومعروفه ..

دخلت لميس الجامعة الأمريكية وكانت طالبه شاطره وحصلت علي بكالوريوس الاعلام من الجامعة الأمريكية سنه ٨٨ بتقدير امتياز .. يعنى مجتهدة جدا طول عمرها الحقيقة ..

يمكن ملامح وجه لميس الحديدي وتكوينها الجسماني مكنش يديها فرصة انها تكون بيج ستار أو نجمة في مجال الميديا أو الاعلام .. أو التواجد علي الشاشات بالشكل المؤثر والمتميز خاصة أننا في العالم العربي بنختار المذيعة بمقاييس الشكل أولا ثم بعد ذلك المضمون أو الفكر عكس المجتمع الغربي أو الأمريكي الي سمح لا وبرا وينفري مثلا أنها تكون رقم واحد في المذيعات على مستوى العالم

المهم ان كان أقصى طموح لميس أنها تكون صحفيه ناجحة ..

وبالفعل اشتغلت صحفيه فتره طويله مع الإعلامي المعروف عماد أديب وكانت الفرصة أنها تتعرف علي شقيقه الاعلامي الأشهر عمرو

اديب وأتجوزوا بالفعل في نهاية التسعينات وأنجبوا أبנם نور الدين وموضوع أنها وافقت تتزوج عمرو وهو متزوج أو مطلق مش موضوعنا رغم أن البعض تحفظ على ده وقتها ..

لكن الاهم أن لميس أكدت أكثر من مره أنها سعيدة بتاريخها وبكل حاحه عملتها أيام الرئيس مبارك خاصة مشاركتها في حملاته الإعلامية والانتخابية سنة ٢٠٠٥

وقالت في أكثر من فيديو أنها فخوره جدا بده ..

وبعد ثوره يناير حصل شيء من التناقض عند معظم مشاهير الاعلام .. فاختلفت الآراء وكل حد أنكلم بشكل مختلف وعكس كل اللي كان يقوله قبل الثورة .. لدرجة أنك تدهش لدرجة الصدمة لما تشوف فيديوهات معظمهم قبل وبعد الثورة .. لأنك هتشوف العجب من تناقض الشخصيات وتحولهم من الابيض للأسود وبدرجة ١٨٠ درجة دون خجل حتى من أنفسهم

أما بصراحه وده يحسب للميس الحديدي كانت على العكس الى حد كبير .. لأنها كانت في كل برامجها تحس أنها متعاطفة مع الرئيس مبارك وشايفه أنه لا يستحق الإهانة والمحاکمات والهجوم عليه من كل من هب ودب .. وده فسره البعض أن كلامها ده من خوفها على نفسها من الجاي ..

رغم أنها من زاويه أخرى كانت بتحاول تتبنى المواقف الجديدة ..

وبعد ثوره يناير قالت جملة بدت للبعض غريبه لما قالت أنها حاسة أن البلد بقي لها شكل جديد ورايحه علي حاحه جديدة!!

المهم أستمرت لميس الحديدي علي أسلوبها الاعلامي ال اتميزت به .. وهو أنها بتكون شديدة اللهجة وحاده في أسلوبها أحيانا .. لكن أهم

ما يميزها كإعلاميه أنها بتصدق نفسها وأي حاجه بتقولها بتكون هي أول واحده مصدقاها وعياشها وده بيتنقل لمشاهديها ..

والحقيقة الناس كمان وبدرجه كبيره كانوا في فتره معينه بيصدقوها وبيقنعوا بكل كلامها ..

ولما وصل الاخوان للحكم كانت لميس الحديدي مثل اعلاميين كتير وطنيين وفاهمين ووقفوا ضد وجودهم بكل قوة .. وبدأت فورا تنقدهم بقوة في برنامجها بلا أي انتظار لوجود أي شيء سلبي علشان تنتقده .. وكانت علي طول شرسة في هجومها .. وده خلى أحدي السيدات التابعة للإخوان أو المدفوعة منهم تقول جملة تناقلتها كل وسائل الإعلام وقتها ومازالت موجوده على اليوتيوب لما صرخت هذه السيدة وقالت أنا بكرهك يا لميس !!

وبصراحة وشهادة حق كان للميس الحديدي دور واضح جدا في كشف نظام الاخوان .. لأنها نجحت أنها تعري هذا النظام وتكشف غباء تصرفاته وكرهه للمصريين .. ووصل الامر أنها تعرضت لتهديدات سوقيه شديده من بعض الشيوخ أو أتباع الاخوان في الوقت ده ..

وكانت لميس من أهم المطلوب الاعتداء عليهم وقت ما كانوا محاصرين مدينة الانتاج الإعلامي ..

وكانت بتتحايل علشان تدخل المدينة من أبواب خلفيه وهى في حالة أصرار على استكمال دورها .. وده يحسب لها كمواطنه مصريه خايفه على بلدها أولا وكإعلاميه ثانيا

وبالطبع بعد ثورة ٣٠ يونيو وزوال حكم الاخوان كان طبيعي أن لميس تكون مع أي حاكم آخر غير الاخوان ..

ورغم أنها أعلنت صراحة دعمها الكامل مع جموع الشعب المصري لترشح الرئيس السيسي لكنها كانت في أضعف حالاتها المهنية في حوارها الشهير هي وزميلها ابراهيم عيسى مع المشير السيسي قبل الانتخابات .. ولا أحد يعلم لماذا .. رغم ما هو معروف عنها من جرأة واحترافيه الا أنها في هذا الحوار كانت بعيده كل البعد عن شخصيتها القوية والانفعالية التي نعرفها ..

المهم أن ليس الحديدي وباستعراض تاريخها المهني والإنساني نتأكد أنها اعلاميه مثقفه وواعيه وتجيد الإنجليزية بطلاقه وتعرف كيف تتعامل مع المواقف الصعبة على الهواء .. وأيضا بطبيعتها مقتحمه وجريئة ومقنعه للمشاهدين في معظم الحالات

ولكن السؤال هل تم توظيفها بشكل جيد ولصالح الوطن والمواطن طوال مشوارها ام تم ذلك لصالح مكاسب خاصة بها وبالقنوات التي عملت بها .. ومعنى أدق بماذا أفادت لميس ناس هذا الوطن بشكل عملي وملموس رغم نجاحها وتميزها وتناقلاها بين كبريات القنوات واخرها قناة العربية الحدث وبالطبع حصولها على أعلى الأجور ..

ثم السؤال الاهم هل لميس الحديدي خدمت بسطاء الوطن كإعلاميه متميزة بظهورها علي الشاشات كل هذا الكم من الساعات على مدار ربع قرن تقريبا ..

هل حاولت بكل طاقتها معالجة مشكلة الفقر مثلا خاصة وأنها أول من يعلم أن ٤٠٪ من المصريين تحت خط الفقر

هل كان ممكن يكون لها دور أقوى مما فعلت بأنها تساهم بمالها الخاص وبمجهودها الإعلامي في القضاء على مشكلة العنوسة مثلا لأنها بكل تأكيد تعرف أن هناك أكثر من ٩ مليون عانس في مصر

هل نظلم لميس الان ونحن نحلل وناقش دورها الذى كنا نأمل
منها أن يكون دورا عمليا وواقعيًا في علاج مشاكلنا الاجتماعية وما
أكثرها

والسؤال قبل أو بعد الاخير هل لميس بما تمتلك من خبرات اعلاميه
ما زالت فخوره بدورها أيام حكم الرئيس مبارك وهل تشعر بالرضا
عن معظم حلقات برامجها التي امتلأت بضيوف هي أكثر من يعلم
أنهم تجار شعارات ومكاسب خاصة على حساب الوطن وناسه الطيبين
هل تمتلك لميس شجاعة الاعتراف أن لها دورا مازال يمكنها القيام به
.. وهو تبنيتها مثلا مشروع المساهمة في تزويج الاف اليتيمات وتخصص
وقتا ومالا من وقتها ومالها وتستغل علاقاتها بأثرياء الوطن وتدعو
معارفها وما أكثرهم للمساعدة في ذلك وأثق أنه لا أحد سيتأخر

هل تفعل ذلك لميس الحديدي التي أحبها الناس لأنها ليست
أقل من نجومات العالم أوبرا وينفري أو أنجلينا جولي وكلاهما تفعل
أضعاف ذلك

هل ننتظر فعلا واقعيًا وملموسًا من نجمة في حجم لميس حتى
تتعادل المعادلة بين ما حصلت عليه من تعليم ومال وشهره وحب
الناس وبين ما قدمت وأعطت من علمها ومالها ونجوميتها لناس
وبسطاء هذا الوطن

هل تفعل لميس الحديدي ذلك ام ستترك الغلابه في حالة غناء مع
صلاح جاهين:

ياشعب نايم علي الرصيف وبالمقشة بتتكس
فيك ناس بتشقى علي الرغيف وناس بتتعب من التنس

(14)

محمود سعد مع مين

انتهت حلقة لميس الحديدي على الالب توب .. ونظرت فرح
فوجدت والدتها تستعد لرفع الاطباق من على السفرة .. فوقفت
لتساعدها .. ولكن كان لصلاح رأى آخر

صلاح: ثواني يا جماعه نشوف مع بعض حلقة إعلامي حير الناس
كلها معاه

فرح: مين ده يا صلاح

الأم: يا ولاد خلونا نشوف ال انتم عاوزينه واحنا بنشرب الشاي ف
الصالون

صلاح: هنشوف الحلقة هنا على السفرة واوعدكم بعدها هعملكم
الشاي بايديا

فرح: يا سلام .. ويطلع مين الإعلامي ده يا صلاح

صلاح: محمود سعد .. هنشوف بسرعة قال ايه برنامج ناسك يا
وطن عن محمود سعد

الأم: عندك حق والله يا صلاح .. انا كنت بحب برامجه قبل يناير
لكن بصراحة بعدها اكتشفت حاجات كتير صدمتني

فرح: مش لوحدهك يا ماما .. بعد الثورتين ناس كتير اتصدموا في
ناس كتير ..

صلاآ: ءلاص ءلونا نشوف الءلة اءلء هءلاقل فلهل أءابه لكل
الاسئلة ..

(15)

حلقة محمود سعد

اهلا بكم

حلقتنا النهارده عن شخصيه كانت متميزة ف مجال الاعلام عموما
وتقديم البرامج خصوصا ..

محمود سعد ..

اتولد ف القاهرة سنه ٥٤ وهو من الشخصيات الإعلامية الجديدة
بالمتابعة لان مشواره الاعلامي سواء صحفي او مقدم برامج كان مميز
جداً ..

اشتغل ف بدايته ف مجلة صباح الخير ثم الكواكب وعمل مدير
لجريدة الوطن الكويتية .. واتعرف ف بدايته كمقدم برامج من خلال
علاقته بالإعلامية هاله سرحان ال منحتة الفرصة ليقدم برنامجه (على
ورق) ..

وكان واضح ان علاقته كويسه مع معظم الفنانين .. وانه صديق
لهم بحكم عمله كصحفي فنى .. وده كان كلمة السر في بداية انطلاق
محمود سعد ..

لكن الانطلاقة الحقيقية كانت ف برنامج البيت بيتك لأنه صنع
منه نجم اعلامي لأهم برنامج توك شو وقتها ..

وكان البيت بيتك بشكل عام حواليه علامات استفهام كثير لأنه
اخذ اهتمام كل المسؤولين بماسيروا وبرعاية مباشرة من وزير الإعلام
شخصيا ..

واصبح هو البرنامج الاوحد والأشهر والأكثر أهمية بموضوعاته
الجديدة والمتنوعة وشكله الإخراجي المختلف وال كان شكل جديد على
برامج التلفزيون المصرى

وكان محمود سعد بيشتغل بذلك وبحس صحفي عارف أزاى يكسب
الناس بتفاصيل صغيرة لكنها مهمه وبتوصل الرسالة المقصودة ..

وكمثال حصل في حلقة من حلقات البرنامج ان اتصل به أحد
المشاهدين على الهوا وهو مريض ويطلب العلاج الذى يتكلف الف
جنيه .. وبعدها بشويه اتصل طفل صغير معه ١٧ جنيه مصروفه
المدرسي ويريد التبرع بال ١٧ جنيه للراجل المريض ..

ثم اتصل احد المقتدرين وهو في حالة تعاطف مع الرجل المريض
واعجاب بتصرف الطفل الصغير .. واتبرع ب الف جنيه للمريض والف
جنيه للطفل !!

وتعمد محمود سعد يعمل حكايات وحواديت زي كده كل شويه
على الهوا ..

وسواء كانت هذه الحواديت متعمده من فريق الاعداد وده
مسموح احيانا ف الاعلام او كانت حقيقية الا ان ده ف النهاية صنع
شعبية لمحمود سعد محدش يقدر ينكرها ..

واستمر نجاح وجماهيرية محمود سعد حتى قيام ثورة يناير ..
وهنا كانت المحطة الفاصلة في مشوار محمود سعد الإعلامي ..

فقد تعامل محمود سعد مع الموقف بذكاء لأنه سارع بتقديم استقالته من التلفزيون المصري

.. رغم انه كان يباخذ اجر كويس لكن مكانش حد عارف أجره كم ..
لحد ما حصلت المكاملة الشهيرة على الهواء بينه وبين وزير الاعلام
الاسبق انس الفقي ..

وال كان فيها الوزير الاسبق اكثر صراحه وجرأة لما قال له انت
بتاخذ ٧ مليون جنيهه وكنت بتطلب تعديل عقدك ل ٩ مليون ف
السنه..

وفيديو المكاملة مازال موجود على اليوتيوب لمن يريد المزيد ..

وربما المكاملة دي كانت بداية ان الناس تبدأ تفكر وتحلل وتسأل
محمود سعد وامثاله من الإعلاميين ال رافعين شعار الدفاع عن الغلابه:
أزاي تتكلموا عن الغلابه والمساكين والمرضى والمحتاجين وانتم
بتاخذوا كل الملايين دي !!

وكان تبرير محمود سعد ببساطه ان برنامجه بيوجب اعلانات كثير
للتلفزيون وبالتالي من حقه ياخذ اجر عالي ..

وطبعا محدش يقدر يعترض لو الاعلانات دي مش جايه للبرنامج
بالأمر المباشر من كبار المسؤولين وقتها .. لأن كان معروف ان معظم
الاعلانات كانت بتيجي للبرنامج بتعليمات !!

وربما البعض مازال يتذكر الحوار ال حصل بينه وبين عبدالله كمال
رئيس تحرير روز اليوسف رحمه الله .. وكان حوار ساخن جدا .. وتبادل
الاثان اتهامات كثيرة بشكل واضح امام ملايين الناس على الهواء ..

المهم مع بداية الثورة اختار محمود سعد انه ينضم للشوار .. وقدر

بسرعه تحسب له انه يتحول لثائر ورافض لنظام مبارك ولكل شيء بالبلد رغم انه كان رمز إعلامي من رموز النظام السابق .. وكان صوت النظام ف برنامج البيت بيتك ومصر النهارده ..

وكان معروف ان وزير الاعلام السابق انس الفقي بيعتبره الطفل المدلل ف التليفزيون المصري لدرجه ان محمود سعد قاله على الهواء انا عاوز كرافت يا معالي الوزير .. قاله هجيلك اتنين مش واحده يا محمود .. !!

وطبعا التفاصيل الصغيرة دي يتأكد مدى ثقته المسؤولين وقتها ف محمود سعد ..

لكنه رغم كل ده قدر يحول نفسه من اعلامي يعمل مع النظام بكل قوه لإعلامي تآثر ضد النظام وبنفس القوه !!
والحقيقة كان موقف صعب لمحمود سعد لما انس الفقي قاله على الهواء:

انت سعيت انك تعمل حوار مع الرئيس مبارك وطلبت مني اكثر من مره انك انت اللي تعمل الحوار معاه .. وقلت انك هتعمله افضل من عماد اديب !!

وكان عماد اديب هو المتخصص تقريبا ف اجراء حوارات مبارك ..

ولكن محمود سعد نفى انه طلب ده من الوزير الأسبق .. واكد ان عمره ما سعى ولا طلب من أنس الفقي انه يعمل حوار مع مبارك أو حتى مع جمال مبارك أو علاء .. وأكد أن عمره ما عمل ده ولا هيعمله ..

وهنا كانت المفاجأة .. !!

ان بعض النشطاء نشروا فيديو على اليوتيوب لمحمود سعد وهو
يجرى حوارا مع علاء مبارك وزوجته .. وفي الفيديو يجاملهما بكل
صدق ويمدحهما بكل إتقان !!..

المهم ان محمود سعد بعد اشتباكه اللفظي مع أنس الفقي على
الهوا تعمد انه يستقيل من التلفزيون المصري .. ويعلن انه مش
هيقدر يكمل لانهم طلبوا منه يعمل حوار مع احمد شفيق .. وكان
شفيق رئيس الوزراء ف الوقت ده .. ورفض على اساس انه ضد احمد
شفيق وضد كل رجال مبارك زي ما قال !!

وبعدها وفي انتخابات الرئاسة كانت المفاجأة الأكبر ان محمود سعد
فاجئ الجميع بموقفه المؤيد لمحمد مرسي واعترف انه صوت له ف
الانتخابات !!..

والغريب انه بعد فترة هاجم محمد مرسي لما صرح انه بيروح
يصلي الفجر في المسجد ..

وقاله محمود سعد على الهواء: كونك بتصلي ف ده شيء يخصك
انت مايخصش الشعب !!

ولما حصلت ثوره الشعب كله في ٣٠ يونيو .. كان موقفه غير واضح
او مفهوم .. هو مع مين بالضبط .. لأنه دائما محير الناس معاه .. !!

فأيام حكم مبارك كان سعد مع مبارك واستفاد من النظام ووصل
لأعلى منصب صحفي وعمل أشهر البرامج ..

وبعد ثوره يناير اصبح ضد الرئيس مبارك ونظامه !!

وايام حكم المجلس العسكري كان سعد في البداية مع المجلس
العسكري وبعد شويه اصبح ضد المجلس العسكري !!

وايام حكم الاخوان كان مع محمد مرسي بوضوح وصوت لصالحه .. ومع الوقت اصبح ضد محمد مرسي وهاجمه بشراسه !!

وبسبب تردد وارتباك موقف محمود سعد .. بدأ معظم الناس بتبتعد عنه ولا تصدق ما يفعل او يقول .. وده حقيقه واضحه للأسف .. وبعترز اني بقولها ولكن الصراحة والوضوح اهم ما يميز برنامج ناسك يا وطن ..

وعموما ومايهمننا في تناولنا لشخصية اعلاميه مثل محمود سعد .. انه من اكثر الاعلاميين ال اتكلموا باسم الغلابه والبسطاء من ابناء الشعب المصري .. واكثر اعلامي الناس كانت بتصدقه وبتتابع برامجه .. ولكن تردده وعدم وضوح موقفه منذ يناير ٢٠١١ كان السبب الرئيسي ف ابتعاد الناس البسيطة عنه .. خاصة لما تابعوا فرح بنته في احد اكبر الفنادق ووسط وجود معظم نجوم الفن وقتها .. ويمكن بعض الناس قالوا حقه يفرح بنته ولكن البعض الاخر قالوا:

طيب أزاي تتكلم باسم البسطاء والغلابه وانت مش حاسس بهم للدرجة دي .. أزاي بتطلع على الشاشات وتقول ان البسطاء محتاجين دعمنا كلنا وانت بتاخذ ملايين ف برامجك وصارف كل ده في حفل فرح بنتك !!

وطبعاً في رأى الشخصي ان ده حقه تماماً .. فطبيعي جدا كلنا بنفرح وبنزقق كمان لما بنجوز اولادنا ..

لكن الفكرة ببساطه ان المجتمع المصري والمحِب لمحمود سعد وبرامجه كان ومازال يتوقع منه دورا اجتماعيا اكبر واقوى .. لأنه يعرف جيدا ان اكثر من نصف الشعب المصري يقف على خط الفقر .. وان

ملايين المرضى يحتاجون مدي المساعدة بالعلاج .. وآلاف الشباب العاطل يبحثون عن فرصة عمل .. وكل هذه القضايا المجتمعية وغيرها تحتاج من كل اعلامي خاصة لو اعلامي ف حجم محمود سعد انه يلعب دور اجتماعي حقيقي .. ويدعم بقوه الناس الغلابة في السر والعلن ..

ده لو فعلاً بنحب بلدنا وناسها الطيبين بصدق ..

چون استيوارت المذيع الامريكي الشهير اتبرع ب ٢١ مليون دولار لدعم شباب الإعلاميين من ماله الخاص ..

وطبعاً مش هسال أي اعلامي ف مصر .. واكيد مش هسال محمود سعد .. هل موقف زي ده ممكن يحصل من أي إعلامي مصري !!

مش هسأل هل عندنا استعداد نتبرع من أموالنا الخاصة ونعالج مرضى ونساعد محتاجين وبنبي مستشفيات ومدارس ونعمل حملات خيرية حقيقيه ف برامجنا .. هل ممكن نعمل ده مقابل ما اخدنا من تعليم وصحه وشهرة ومال ومجد وسلطه وغيرها ..

هل هنقدر نواجه انفسنا ونعترف اننا مقصرين جدا مع بسطاء الوطن ال بنتكلم باسمهم ولا هنفضل كثير نغنى معاهم ومع صلاح جاهين:

ياشعب نايم ع الرصيف وبالمقشه بتتكنس

فيك ناس بتشقي ع الرغيف وناس بتتعب من التنس !!

(16)

منى ووائل غنيم

يضع صلاح كاسات الشاي أمام فرح ووالدتها وهو يضحك:

صلاح: احلى شاي من عمايل ايديا لأغلى الناس

الأم: تسلّم ايديك يا صلاح .. طول عمرك جدع وبتفهم

فرح: وهو ده ال مأخرنا يا ماما .. اننا بنفهم

صلاح: رغم انى اكتشفت بعد ما تابعت حلقات ناسك يا وطن

انك تبطل تحاول تفهم لو عاوز تعيش مرتاح

الأم: اوعى تقول كده يا صلاح .. لازم تفهموا وتعرفوا حقيقة كل

الناس المتصدرة للمشهد علشان محدش يضحك عليكم

فرح: اطمني يا ماما .. بقى صعب أي حد يضحك علينا خلاص

صلاح يفتح اللاب توب بعد أن وضع السكر في الشاي لزوجته

ومامتها

صلاح: مين فيكم هيشوف حلقة منى الشاذلي معايا

الأم: لا كله الا منى الشاذلي .. دي ست جميلة وموت فيها .. رغم

انى زعلت منها ايام الثورة

فرح: عارفه انك زعلتي منها بسبب موقفها مع ال اسمه وائل

غنيم وال زيّه

صلاح: معذورة يا جماعة .. كانت لسه الدنيا مش واضحه وهى
مش عارفه مصر رايحه على فين
الأم: أزاى اعلاميه كبيره زيها متكونش عارفه يا صلاح
فرح: خلاص يا جماعه خلونا الأول نشوف قال ايه عنها برنامج
ناسك يا وطن ..

(17)

حلقة منى الشاذلي

اهلا بكم

نجمة حلقة انهارده اسمها منى محمود أحمد الشاذلي .. اتولدت
سنه ٧٠ في ميت غمر في المنصورة .. علشان كده فضلت فتره طويلة
جميلة جميلات المذيعات بلا منازع

منى الشاذلي حصلت علي بكالوريوس علوم سياسيه .. واشتغلت
في بداية حياتها بشركه المقاولون العرب في العلاقات العامة .. وسرعان
ما انتقلت الي محطة ايه أر تي التي يملكها رجل الاعمال السعودي
صالح كامل

وبالقناة التقت بالإعلامي المعروف والناجح سمير يوسف وتزوجا
سريعا وأنجبا ٣ بنات منهم اثنتان توأم

منى الشاذلي كإعلاميه لا جدال أنها قبل ثوره يناير كانت رقم
واحد بين الاعلاميات وأيضا الاعلاميين .. بل كان البعض يعتبرها اعلامية
مصر الاولي

برنامجها العاشرة مساءا يعتبر هو أهم وأفضل ما قدمت منى
الشاذلي في حياتها المهنية رغم محاولاتها وبرامجها المتنوعة قبله وبعده
.. ولكن ظل العاشرة مساءا مرتبطا باسمها لسنوات طويله ..

ويحسب لها أنها كانت تقدم هذا البرنامج بشيء من التغيير شكلا

ومضمونا

فمني الشاذلي تميزت بضحكتها الرقيقة وتسبيلة عينيها ورشاققتها
ومظهرها الشيك وطلتها المملوءة ثقه وتفاؤل ..

وقميزت منى بان كل مشاهد وجد فيها الاخت والابنة والحببية
والزوجة والصديقة والزميلة .. لان ملامحها الجميلة ونبرات صوتها
الهادئة .. وحتى صمتها وكلامها وحوارها المتدفق أحيانا والمتقطع في
أحيان أخرى بحثا عن أنسب الكلمات .. كل ذلك جعل منها الاقرب
الى قلوب الناس في كل البيوت .. وجعل من برنامجها الوجة الإعلامية
الأساسية لجميع الاعمار والفئات ..

والمدعش أن معظم جمهورها كان من السيدات والبنات وليس
الرجال فقط .. فرغم جمالها اللافت الا أنها كانت تدخل كل القلوب
ببساطتها وأسلوبها السهل الممتنع

مني الشاذلي كإعلاميه محبوبه وجميله وناجحة حققت معادله
صعبه .. لأنها كانت صاحبه الحظ انها تعمل لقاءات وانفرادات مع
مشاهير العالم بلا استثناء بداية من رئيس الولايات المتحدة الأمريكية
وكان جورج بوش وقتها مرورا بكل الشخصيات الشهيرة ووصولاً
لحوارها ال اعتبره البعض من الطف حواراتها وهو حوارها الشهير مع
هيفاء وهبي ..

والسبب أنها سألتها بأسلوبها البسيط والعفوي والبريء وأيضا
المليء بكل أنواع الالغام:

تفتكري ياهيفا معظم الشباب بيدخلوا اليوتيوب يدوروا علي
أغانيكي علشان يشوفوا ايه؟!!

وطبعا كان جواب هيفا حاضرا فهي تعرف كيف ترد على مثل هذه الأسئلة بذكاء معروف عنها ولكن اللافت للنظر في سؤال منى أنها سألتها الشباب بيدخلوا يدوروا على أغانيكي علشان يشوفوا ايه .. مش يسمعو ايه !! .. وده أعتبره البعض خبث مهني مسموح به في مثل هذه اللقاءات لجذب شريحة كبيره من جمهور الضيفة المثيرة للجدل الفني والإعلامي منذ ظهورها

المهم أن ذلك كان قبل ثورة يناير ٢٠١١ .. حيث كانت منى الشاذلي اعلامية لها حضور وتميز كبيرين .. ولها شخصية خاصة بها .. وكان أسمها رمز وعنوان للنجاح الاعلامي لأي قناة ..

ولكن أثناء الثوره بدأت تتكشف حقائق كثيره .. وكان واضح جدا أن الارتباك اللي حصل لكل الاعلاميين في مصر حصل بشكل أوضح وأكبر لمنى الشاذلي .. فقد كانت في حيره من أمرها ولا تعرف ماذا تفعل .. فظهرت شديدة التعاطف مع نظام الرئيس الاسبق مبارك .. وفي نفس الوقت تتقاذفها الامواج بحثا عن النظام القادم .. وهى تتسائل في تخوف ياترى هيكون مين وأزاي وليه !?

ولذلك شاهدها الناس قبل تنحي مبارك تكاد تكون بتترجاه وتتوسل اليه كل ما يتأزم الموقف في ميدان التحرير .. فتخرج كل ليله لتقول له بكلماتها التي مازال المشاهد يتذكرها:

أرجوك يا سيادة الرئيس تدخل لحل الموقف .. أرجوك تدخل وشوف حل ..

وكانها تناشده بين السطور تقديم بعض التنازلات الصعبة لحل الموقف أو على الاقل أقالة الحكومة وأبعاد بعض الشخصيات المرفوضة من المتظاهرين دون التصريح بذلك

ومؤكد كلنا نتذكر بكاء مني الشاذلي .. فقد بكت بدموع حقيقيه وأبكت مصر كلها يوم خطاب ما قبل التنحي .. وكانت من أهم أسباب عودة الشعور بالتعاطف الكبير مع مبارك من ملايين المشاهدين داخل وخارج مصر ..

وقالت كلماتها المختلطة بدموعها ونبرات صوتها الباكي والتي ستظل أدق تعبير عن حالة الاعلام الحائر والمرتبك وقتها حيث راحت تردد أنها تشكر الرئيس مبارك لأنه أعلن أنه لم يكن ينتوي الترشح وأنه يطلب مهله شهورا لتجاوز الموقف وأجراء انتخابات رئاسيه لن يدخلها هو أو أبنه جمال الذى كان الجميع مقتنعا أنه الرئيس القادم ..

وبالطبع زادت الامور سوءا بعدها وأضطر مبارك للتنحي وبدأت مرحلة جديده من تاريخ مصر ..

وكان وضع الاعلام المصري ونجومه في منتهى الحرج .. خاصة أن معظمهم ظل ولمدة ٣٠ عاما يمدح ويسبح بحمد النظام السابق فماذا يفعل كل منهم مع الظروف الجديدة .. وماذا سيكون موقف منى الشاذلي التي كانت من أبرز نجومات الشاشات وقتها !؟

الحقيقة أن منى الشاذلي بعد الثورة .. وبعد تأكدها أن نظام مبارك أنتهى .. ركبت الموجه زي ناس كثير جدا من الاعلاميين ..

وللأسف بدأت تلعب دورا أثق تماما أنها لم تكن مدركة أو مستوعبه خطورته أو مدى صحته .. وهو دعمها لبعض الثوار بلا حسابات دقيقه عن من هم وما هدفهم ومن يقف خلفهم ويمولهم ..

وطبعا أشهر هذا الدعم ما فعلته منى الشاذلي يوم استضافت وائل غنيم بمسرحيته الهزلية خاصة حينما بكى بتمثيل واضح وخرج من الاستديو لتقف منى وتحاول اعادته للحوار وسط ارتباكها ودموعها

أيضا ..

وهو ما جعل منه ومن أمثاله حكاما جددا يملون الشروط وعلى الجميع التنفيذ ..

ولكن لأن لمصر رب يحميها .. وجيشا يفهم ويدرس ويعرف أبعاد كل ما يحدث .. حدث ما لم يخطط له الخبثاء وأعداء الوطن ..

وظلت مصر وستظل بإذن الله قادره على تجاوز كل هذه البذاءات مهما كانت .. فمصر وطوال تاريخها ليست للبيع .. وشعبها لا يعرف الا الوحدة والتماسك مهما فعل الخونة والسفهاء بالداخل والخارج

ومن هنا كان تحفظ البعض وقتها .. فكيف لأهم اعلاميه في مصر لا تدرك خطورة ما يحدث .. وكيف لها ولفريق عملها عدم استبيان الأمر مسبقا ومحاولة قراءة المشهد ومعرفة من هؤلاء الضيوف الذين امتلأت بهم استديوهات كل البرامج .. وراح الجميع ينافقهم ويخشاهم ويعمل لهم كل الحسابات ..

وكان من المفترض لإعلامية كبيره مثلها يسمعها ويصدقها ويحبها كل المصريين أن يكون لها موقفا حاسما وحازما مهما كلفها الأمر ..

لأن في مثل هذه الظروف الإعلامي هو جندي محارب في مجاله ويتحتم عليه مواجهة أعداء الوطن بكل قوه

المهم أنه لا لوم على مني الشاذلي فقد يكون لها قناعتها أو مبررها وهذا حقها تماما .. ولكن ما حاولت فعله بشكل أو بآخر أنها حافظت علي الوسطية .. فلا هي كانت مع ولا كانت ضد ..

وهذا الموقف هو الأخطر على الإطلاق ..

المهم أستمرت مني الشاذلي في عملها وبدأت أسهمها بكل صراحة

تنزل عند جمهورها بسبب أنها أصرت على الإمساك بالعصا من المنتصف .. فلا هي مع الثورة ولا هي ضدها .. فلا أستمرت تدعم إيجابيات النظام السابق ولا هي فعلت مثل عمرو أديب مثلا حينما أعلنها على الهواء صارخا أنه تعرض للإذلال في عهد مبارك وتنصل من كل مكاسبه وقتها ..

ظلت منى في المنتصف وهذا ما أفقدها كثيرا من جماهيريتها ومصداقيتها

ولو امتلكت منى الشاذلي وقتها شجاعة الاعتراف أنها أخطأت يوم تبنت مواقف من يدعون أنهم ثوارا رغم أهدافهم الخبيثة في تدمير الوطن وليس إصلاحه .. لو حدث ذلك لاكتسبت ثقة ومحبة كل الناس ولأستمرت رقم واحد كما كانت قبل الثورة !!

وربما ده كان سبب ابتعادها عن السياسة وراحت تقدم برامجها سواء بقناة ام بي سي التي انتقلت اليها بأجر كبير كما قيل عن برنامجها جملته مفيدة أو عودتها لقناة سي بي سي ببرنامج معكم .. واختارت نوعيه أخرى من البرامج لا علاقة لها بعالم التوك شو أو الكلام في القضايا السياسية ..

ونجحت بالفعل في برامجها الجديدة لتمييزها بأسلوب مختلف كما قلنا ولعلنا نتذكر حواراتها الرائعة مع ماجده الرومي التي ظهرت كما لم تظهر من قبل كإنسانه وليس فقط كفنانه .. ومع فاروق الباز الذي جعلته يبكي وبكت معه وهى تحاوره بطريقتها التي أخرجته من عالم العلماء الى الإنسان المصري البسيط والمتواضع ..

ولكنها ظلت في هذه المنطقة المجتمعية ببرامجها بعيدا عن معترك السياسة وتناقضاتها ..

وأنا شخصيا لا أميل مطلقا لتفسير أن ذلك تم بتعليمات كما ردد البعض ولكنه اختيار ذكي من منى الشاذلي بعدما مرت بأصعب تجربته مهنيه وقت ثوره يناير وبعدها ..

ونصل معا الى سؤالنا مع كل شخصية من شخصيات ناس الوطن .. ماذا قدمت منى الشاذلي لبسطاء الوطن بعدما حصلت على التعليم والشهرة والمال والمجد والمحبة من كل المصريين ..

ماذا قدمت لفقراء الوطن وهى تعلم أن هناك بالقبور والعشوائيات يسكن أكثر من مليونين شخص .. بماذا ساعدت المرضى الذين لا يجدون سريرا بمستشفى أو علاجا لأمراضهم أو تقديرا لإنسانيتهم ..

وقبل أن يسأل أحدنا هل هذا هو دورها .. أقول نعم أنه مهمتها ومهمتنا جميعا .. وخاصة أنها من نجوم ومشاهير الوطن .. وكانت ومازالت تستطيع تبنى مشكله مجتمعيه في كل حلقة من برامجها وتعمل على حلها بشكل واقعى وعملي ..

ولنا أن نتخيل منى الشاذلي في زيارة لقريه فقيره أو حي شعبي يحتاج مدرسه ومستشفى وجامع وكنيسه .. لنا أن نتخيل لو قامت منى بالتبرع من مالها الخاص على الهواء وليس سرا لتصبح قدوه لغيرها .. ودعت الجميع للمساهمة في رصف وأناره وتجميل هذا الحى أو تلك القريه ..

لنا أن نتخيل ذلك وأكثر لأن منى الشاذلي قادره على فعل ذلك ووقتها ستكون هي أسعد الناس لأنى أعرف عنها طيبة القلب ونقاء الضمير وحبها الحقيقي لمصر والمصريين

ومؤكد سيتضاعف حب الناس لها وسراها جميعا بأعين مختلفه شكلا ومضمونا وستنافس بل تتفوق مهنيا وانسانيا على أوبرا وينفري

معشوقة فقراء العالم بأعمالها الخيرية في كل مكان ..

هل تفعلها منى الشاذلي وهى المصرية الجميلة الذكية في القادم
من الأيام ام ستكتفى بدورها في التسلية والترفيه ببرامجها ومكاسبها ..
وتترك البسطاء ينشدون مع صلاح جاهين

يا شعب نايم علي الرصيف وبالمقشه بتتكنس

فيك ناس بتشقى علي الرغيف وناس بتتعب من التنس

(18)

زمن هيفاء وهبي

حالة من الصمت تسود المكان بعد أن فرغ الجميع من مشاهدة الحلقة .. فلا أجد بريد ام يعلق ولو بكلمة .. فقد احتار الجميع في أمر بعض مشاهير الوطن .. الذين حصلوا على كل المكاسب من تعليم وشهرة ومال ووجاهة اجتماعية دون أن يعطوا لبسطاء الوطن سوى الفتات

أراد صلاح أن يكسر حاله الصمت فابتسم وقال:

صلاح: ايه رايكم ان آخر حلقة هنشوفها هتعجبكم جدا

فرح: لا خلاص .. انا مش عاوزه اشوف حاجه تأني .. انا بندم اني درست اعلام اصلا

الأم: ايه ال انتي بتقوليه ده يا فرح

صلاح: بتقول ال جوانا كلنا كشباب كان نفسنا نأخذ فرصتنا ونلاقي حد من الكبار نعتبره قدوه لنا

الأم: انا هعملكم حاجه حلوه تأكلوها وبعدين نتفاهم ف الموضوع

ده

فرح: لا يا ماما متتعييش نفسك .. احنا أكلنا وشربنا الشاي وزى

الفل .. يلا بينا يا صلاح نمشي ومنسهرش ماما

الأم: تمشوا ايه انا ما صدقت انكم تيجوا تزوروني يا فرح

صلاح: انا مش همشى الا لما نشوف آخر حلقة وانا واثق انها
هتعجبكم جدا

فرح: حلقة مين تاني يا صلاح

صلاح: هيفاء وهبي

الأم: والنبي انت رايق يا صلاح .. وبعدين هيفا مش مصريه

فرح: بالعكس .. الست دي بمية رجل ومصريه أكثر من ناس كتير

صلاح: والأهم أنها بذكائها عملت اسمها ال محدش يقدر ينكره

الأم: طيب شوfoها انتم وانا هعملكم حاجه حلوه تحلوا بيها بعد

الاكل

صلاح: مفيش احلى من هيفا .. وهنقعد كلنا نشوف برنامج ناسك

يا وطن قال ايه عنها وبعدين نتفاهم .

(19)

حلقة هيفاء وهبي

اهلا بكم

النهاردة مش هنتكلم عن شخصية عادية .. هنتكلم عن شخصية مختلفة تماما في كل شيء ..

شخصية النهاردة .. هيفاء وهبي

هيفاء من صغرها مميزة جدا وعندها قوة شخصية وذكاء غير عادي .. اشتغلت في البداية في محل بيع مجوهرات وكانت شاطره في التعامل مع الناس .. لكنها سرعان ماتجوزت وهى صغيرة جدا من ابن عمتها .. وانجبت ابنتها الوحيدة ،،

واول مره الناس تشوفها على الشاشة كان سنة ٩٤ في اعلان عن مسحوق غسيل تقريبا .

والإعلان ده لسه موجود على اليوتيوب حتى الآن ..

هيفاء بعدها اشتغلت عارضة أزياء .. وكانت متميزة في شغلها من اول يوم ..

والشيء اللافت للنظر انها في بداية حياتها كان عندها إصرار غريب وكانت واثقة لدرجة اليقين انها في يوم من الايام هتكون نجمة .. لكن هي نفسها مكانتش عارفه هتكون نجمه في ايه .. هل هتكون نجمة في عروض الأزياء ولا التمثيل ولا الاعلانات ولا الرقص ولا ايه ..

وربما كان اخر ما تتخيله انها تصبح نجمة في مجال الغناء .. او انها تكون مطربة ولها كل هذا الجمهور ..

والدليل انها في احدي حفلات المطرب الأشهر وقتها راغب علامة .. تعمدت تصعد على المسرح وتشارك بالرقص وهو بيغني .. والرقصة دي كانت بداية انطلاقها لعالم الشهرة والأضواء ..

ورغم ان قوة صوت هيفاء وهبي مش موضوعنا .. لكنها غنت بالفعل غنوة اسمها (وحدي يا ليالي) .. وصورتها فيديو كليب .. لكنه كان كليب عادي ومحققش أي نجاح ..

بعدها فاجئت هيفاء وهبي جمهورها بغنوة (انا هيفا) ال لفتت النظر ليها بشده .. شكلا وموضوعا .. وزى ما قلت المضمون كصوت او ككلمات او موسيقي او غيره .. ممكن يكون الجمهور اختلف عليه .. لكن الجميع اتفق وأعجب بشكل وأنوثة وطريقة تصوير واداء هيفاء في كليب الغنوة

وبعدها واصلت هيفاء نجاحاتها في كل الدول العربية .. وأصبح لها جمهور بالملايين من المعجبين والمعجبات ..

ولأنها بطبيعتها طموحه وبتعشق التحدي .. وصل بها خيالها وقوة إصرارها انها تنجح اكثر وتوصل للعالمية .. وغنت بالفعل بالإنجليزية مع المطرب العالمي (شاجي) غنوة (سيكسى ليدي) .. وحققت نجاح كبير وزاد الإقبال عليها وعملت حفلات في معظم دول العالم ..

وكل متابع لهيفاء وهبي ومحطاتها السريعة والمتلاحقة يتأكد أن الشغل هو كل حياتها .. ومفيش حاجه بتشغلها في الدنيا غير جمالها واستمرار نجاحها ..

ولكن بشيء من التركيز يشعر كل محب لهيفاء وهبي الإنسانية

أن هناك وجعا داخلها تعيشه بينها وبين نفسها .. هي الوحيدة ال
حساه..

وده يمكن أعطي الفرصة لطوني خليفة انه يسألها بشكل جريء عن
تعليقها على بعض صورها التي يراها المشاهد غير لائقة او ما شابه ..
ويسألها بجرأة أكثر عن أبنيتها وعلاقتها بها ..

وكان البكاء إلى درجة الانهيار هو رد هيفاء الوحيد وقتها !!

ورغم ضعف هيفاء وهبي امام موضوع ابنتها إلا أنها تمتلك قوة
شخصية غير عاديه تصل إلى درجة الشراسة أحيانا .. ولما سألوها ليه
معظم الصحفيين يبهاجموكي وبينشروا حولك دائما الشائعات .. كان
ردها غير متوقع ولكنه صادق وحقيقي إلى حد كبير لأنها قالت
بلكنتها اللبنانية:

كل حدا معاه ورقة وقلم او عنده جريدة وعاوز بيع يروح يكتب
أي شيء عن هيفا وخلص !!

وخربشة هيفاء بتبان في تصرفات عفويه وغير منطقية احيانا ..
لأنها في بعض المواقف ممكن تضرب وتقول ألفاظ صعبة زي ما شوفنا
ال عملته في رامز جلال لما استضافها في برنامجه وبعد اكتشافها المقلب
الكوميدي والمرعب ال عمله معاه !!

والحقيقة علاقة هيفاء وهبي ببعض زميلاتها كانت دائما شائكة ..
و اتنشر كلام كثير عن خلافاتها مع البعض لأسباب كثيرة .. أهمها طبعاً
الغيرة النسائية والمهنية .. بسبب جمالها ونجاحها في معظم اغانيها
واعمالها السينمائية او بالفيديو ..

ولكنها عادة ما تحسم أي خلاف أو منافسة لصالحها بكل سهولة ..

ووصل نجاح هيفاء وهبي إلى درجة ان نجم في حجم عادل امام
استغل ده في أحد أفلامه لما خلى الفنانة ميرفت أمين تقلد هيفاء في
غنوتها الشهيرة ((بوس الواوا)) !!..

وده أضاف للفيلم بكل تأكيد ..

حياة هيفاء وهبي الخاصة أو العامة مادة خصبة للصحفيين عموما
.. وصعب يعدي يوم بدون ما نلاقي اخبار عنها بصفحات الجرائد
والمجلات ..

لكن زواجها وطلاقها من رجل الأعمال المعروف احمد أبو هشيمة
كان له حكاية ومواويل كثيرة اتقالت عنهم .. بدأت الحكاية لما قابلها
في حفلة من الحفلات واتعرف عليها وقالها انا احمد خطيبك .. وتم
زواجهم خلال فترة بسيطة .. ووقتها نفوا كل الأقاويل والأرقام ال
اتقالت عن حفل الزفاف او المهر أو مؤرخ الصداق أو غيره

وفضلت حياتهم طول الوقت في سره شديده ومحدث عرف
تفاصيل كثير عنها .. وحتى بعد الانفصال فضلوا على علاقة من الود
والاحترام .. ومقدرش حد من الصحفيين او البرامجيين انه يوسع دائرة
الخلاف بينهم رغم محاولاتهم المتعددة لفعل ذلك ..

ولكن كان لها رأي قالته بوضوح وابتسامة مع طوني خليفة:

شكرا للزواج وخلص مش هتجوز تاني !!

وبعيدا عن معاني الكلمات تحديدا أو حرفيا وبعيدا عن ال تقصده
هيفاء وهبي .. لكن قوة شخصيتها فرضت نفسها علي الجميع ..
وأصبحت نجمة ونجمة كبيرة في مجالها ..

اعتبروها موهبة كاملة او نصف موهبة في الغناء او الرقص او
التمثيل .. اعتبروها كما تشاءون .. ولكنها في النهاية مطربة وفنانة

لبنانية مصرية عربية لها وجودها وحضورها في العالم العربي كله ..
وده ال بيخلينا نستعرض مشوارها ورحلة نجاحها فنيا وانسانيا في
ناسك يا وطن ..

وده ال بيخلينا نقولها بكل صراحة زي ما قلنا لكبار المشاهير ال
أخدوا كثيرا من اوطانهم ونأمل منهم مد يد العون لبسطاء وفقراء
بلادهم ..

فهل تمتلك هيفا الشجاعة لتبنى حملة خيرية مجتمعيه سواء في
مصر او لبنان .. هل يكون لها دور اجتماعي مفيد وعلني امام الجميع
.. هل تفعل مثل انجلينا جولي التي تجوب العالم لعمل الخير .. او
مثل شاكيلا ال اتصرفت بدافع أنساني واجتماعي لما اتبرعت بملايين
الدولارات من أموالها علشان تعمل جمعية لرعاية الأطفال في كولومبيا
ولرعاية أمراض مزمنة في كامبوديا وغيرها

أعتقد أن هيفاء وهبي عندها الشجاعة والقوة والإنسانية أنها
تعمل ده وأكثر ..

ولو عملت ده وقامت بدور اجتماعي بجانب دورها الفني .. مؤكد
ساعتها الراضين لفتها وال بيهاجموها عمال على بطال .. هيكونوا
معها وهيشجعوها وكثير هيتبرعوا زيها .. وهتكون سبب رئيسي في
مساعدة ناس كثير بتحبها وبتتابع أعمالها ..

أثق ان هيفاء وهبي الإنسانية مش هتتأخر في انها تبدأ فوراً حملة
قوية ومعها جمهورها لدعم جنوب لبنان ال انهكه الحرب او لبناء
مستشفيات ومدارس لخدمة قرى واحياء مصر ال دايماً بتقول انها
صاحبة فضل عليها ..

أثق أنها هتكون احرص الناس على أنها تعمل ده لأنها عانت

انسانيا كثر وحاسة بالناس البسطاء ال تعبوا من الغناء مع صلاح
جاهين:

يا شعب نايم ع الرصيف

وبالمقشة بتكنس

فيك ناس بتشقى ع الرغيف

وناس بتتعب م التنس

(20)

صلاح فخر العرب

يغلق صلاح اللاب توب في يأس وإحباط ويقف بعد تنهيده عميقه

صلاح: يلا بينا يا فرح .. الزمن ده مش زمننا

فرح: يلا بينا يا صلاح..عاوزه حاجه يا ماما

الام: ايه الفيلم العربي ال كله نكد ده .. مالكم يا اولاد قلبتوها دراما

ليه

فرح: بصراحه يا ماما انا وصلاح قررنا نهاجر .. هنشوف أي فرصه

سفر ونسافر .. نشتغل أي حاجه بره مصر

الام: طيب ماتشتغلوا أي حاجه جوه مصر

صلاح: زي ايه احنا فعلا مستعدين نشتغل أي حاجه بعيد عن

الاعلام الي درسناه وحبناه

فرح: وياريتنا مدرسناه ولاحبناه .. ياريتنا اتعلمنا أي حاجه غير

الاعلام

الام: كل الاحباط ده علشان عرفتوا تاريخ كام شخصيه منهم الصح

ومنهم الغلط

صلاح: قصدك منهم الي تاجر بينا بشعارات وطنيه

فرح: ومنهم الي تاجر بينا بشعارات دينيه

صلاح: كلهم ضحكوا علينا وتاجروا بينا

فرح: كلهم خدعونا بكلامهم الحلو

صلاح: استغلوا الوطن وناسه أسوأ استغلال

فرح: اخدوا كل حاجه .. تعليم وشهرة وفلوس ومناصب

صلاح: وفي نفس الوقت ياريتهم ادوا حاجه للغلابه الي بيتكلموا

بإسمهم

فرح: دول مصوا دمنا وهما مش حاسين بالكارثة الي بيعملوها

صلاح: والمصيبة انهم فاهمين اننا مش فاهمين

فرح: وبعد دا كله مش عوزانا نهاجر يا ماما

الام: ايه كل دا يا ولاد .. معقول كل دا جواكم .. معقول شايفين

الصورة سودا اوى كده .. معقول شايفين كل الكبار غلط وانتم ال صح

صلاح: ايوه احنا صح وعلشان نفضل صح لازم نهاجر ونسيلهم

البلد

فرح: ايوه يا ماما .. الحل الوحيد ان احنا كلنا كشباب نهاجر

الام: قصدك تهربوا لأنكم جنبنا .. جنبنا ومش قد التحدي ولا

المسؤولية .. عموما هاجروا واهربوا .. بس قبل ما تهاجروا لازم تفهموا

وتعرفوا ان مصر بخير وهتفضل بخير .. لان زي مابتقولوا فيها اعلاميين

وفنانين ورجال دين ومشاهير كتير منتفعين وبيتاجروا وبيكسبوا على

حساب الغلابه .. فيها ناس تانية شرفاء بجد وولاد بلد بجد .. وبيقفوا

كتير جنب بلدنا من غير ماياخدوا أي حاجه

فرح: والله ضحكيتني يا ماما .. وفي الشرفاء دول

صلاح: قوليلنا على واحد بس وقف جنب الغلابه بإخلاص

فرح: وساعتها اوعدك يا ماما اننا هنعمل زيه ومش هنهاجر

الأم: انا مستعده اقولكم على مليون واحد . بس انا هسألکم سؤال
واحد عن شاب زيكم اسمه محمد صلاح اکید عارفينه

صلاح: طبعا عارفينه .. مين ميعرفش صلاح

فرح: دا فخر مصر والعرب يا ماما

الأم: طب عارفين محمد صلاح الشاب الصغير ده الي اتعلم تعليم
بسيط واتربى في قريه بسيطة وعاش طفولة بسيطة .. عارفين لما ربنا
كرمه وقف جنب الغلابه ازاي واتبرع لمصر بايه !!

فرح: تقصدي ايه يا ماما

الأم: اقصد اقولكم فوقوا وبطلوا يأس وكمّلوا قراءة الكتاب وشوفوا
ناسك يا وطن قال ايه عن صلاح وامثاله من شرفاء الوطن .

(21)

صلاح الملك المصري

محمد صلاح حامد غالي طه .. اتولد يوم ١٥ يونيو عام ١٩٩٢
نشأ صلاح في أسرة بسيطة مكونة من أب يعمل في التجارة وأم ربة
منزل وأخ وأخت .. وكانت ظروف الأسرة المالية الصعبة عائقاً بينه وبين
الالتحاق بجامعة كبيرة
في ١٨ ديسمبر عام ٢٠١٣ تزوج محمد صلاح من (ماجى محمد)
زميلته بالمدرسة وأنجبوا بنتهم مكة

ومؤكد معظم الشباب عارفين رحلة نجاحه وإصراره على الاحتراف
ومشواره ال بدأ من نادى المقاولون العرب في مصر ومرورا بعدة أندية
أوروبية ووصل لأنه أصبح أهم لاعب في نادى ليفربول الإنجليزي
وأحسن لاعب في افريقيا وخامس أفضل لاعب على مستوى العالم ..
والنجاح ده محدش عمله قبله في مصر ..

لكن الأهم من النجاح كلاعب كورة هو اخلاق صلاح ووطنيته
وحبه الحقيقي لمصر وناسها الطيبين .. فرغم أنه ما اخدش شيء من
مصر زي غيره .. الا ان تبرعاته ومساعداته صعب حصرها:

قام بتصوير ثلاث إعلانات لصالح صندوق مكافحة وعلاج الإدمان
والتعاطى المصري كان شعاره انت أقوى من المخدرات
تبرع بخمسة ملايين جنيه لصندوق تحيا مصر

تبرع بـ١٢ مليون جنيه لمستشفى سرطان الأطفال ٥٧٣٥٧ لشراء جهاز زراعة نخاع العظم.

تبرع بإنشاء وحدة غسيل كلوى لمرضى الفشل الكلوي بقريته نجريج التابعة لمركز بسيون في محافظة الغربية.

ساهم في إنشاء معهد أزهرى لأبناء قريته بقيمة ٨ ملايين جنيه.

ساهم في تطوير إنشاءات وفصول مدرسته الابتدائية في قرية نجريج وبنى مسجد داخل المدرسة.

تبرع لإنشاء وحدة حضانات للأطفال ووحدة تنفس صناعي في قرية نجريج.

خصص مرتبات شهرية ثابتة للفقراء في قريته ووصلت قيمتها إلى حوالي ٥٠ ألف جنيه شهريا.

تبرع بمبلغ كبير لجمعية قدامى اللاعبين المصرية لرعاية قدامى اللاعبين وأسرهم.

تبرع بمبلغ كبير للمساهمة في علاج مرض الكبد الوبائي وفيروس سي.

تبرع به ملايين جنيه لتطوير المستشفيات والملاجئ ودور الأيتام ومركز علاج الأورام في مدينة طنطا.

ساهم في إنشاء وحدة اسعاف في قرية نجريج.

تكفل بزواج ٧٠ عريسا وعروسة من أهالي قريته بمبلغ وصل الى ٤ ملايين ونصف المليون جنيه.

أنشأ مؤسسة محمد صلاح الخيرية لمساعدة الفقراء.

أنشأ صندوقا مخصصا للأيتام والأرامل من أهل قريته لصرف راتب

شهرى لهم.

تحمل تكاليف علاج المرضى والعمليات الجراحية للفقراء من أهل
قريته

(22)

ابن البلد

الام: شوفتوا محمد صلاح .. الشاب المصري الاصيل .. عمل ايه للبلد .. شوفتوا عمل ايه للوطن وناسه .. رغم انه ما اخدش حاجه من البلد اصلا .. لا فلوس ولا منصب ولا غيره

صلاح: ربنا يباركله هو الحاجه الوحيدة الي بتفرحنا في الزمن ده

الام: لا .. في ناس كتير زي صلاح بس انتم مش شايفين ومش عاوزين تشوفوا .. وعاجبكم حالة الياس الي انتم عايشين فيها دي

فرح: يا ماما .. صلاح ده واحد في الدنيا كلها وصعب يتكرر

الام: بالعكس .. مصر فيها مليون صلاح .. الطالب الي بيجهد وينجح ممكن يبقى زي صلاح .. الموظف الي بيشتغل بضمير ميختلفش عن صلاح .. المسؤول الي بيهتم بمشاكل الناس مفروض نحبه زي صلاح .. الجندي البطل الي بيدافع عننا هو ده فخرنا الحقيقي وفخر صلاح .. كل واحد فينا لما بيراعي ربنا في مصر اكيد زيه زي صلاح .. حتى انتي وجوزك .. لما تبطلوا يأس واحباط وتتحدا الظروف وتنجحوا .. هتفرحونا زي صلاح

فرح: يا ماما ارحمينا .. بصراحة تعبنا شعارات .. الواقع حاجه والي انتي بتقوليه ده حاجه

الام: الواقع هو الي انا بقوله .. بس انتم مش عايزين تشوفوه .. وعموما هنصحكم تكملوا قراءة ناسك يا وطن .. وشوفوا مكتوب ايه

عن مواطن عادى .. محدش يعرفه .. لكنه بطل حقيقي .. وميقلش
أبدا عن صلاح .. لأنه عمل لقريته الي محدش عمله

فرح: مين ده يا ماما!؟

(23)

ابن البلد والغربة

ومن ناس الوطن أيضا .. نجم من نجوم مجتمعه وقريته .. لا يعرفه ملايين الناس ولا يحظى بشهرة ونجومية أقل مطرب شعبي أو أي لاعب كره .. ولكنه ينال محبة واحترام كل من يعرفه

ولد في قريه بسيطة بدلتا مصر بالمنصورة .. ومن حسن حظه كانت أسرته تسكن بيتا عاديا من بيوت الريف المصري بالقرب من النيل .. ولأن ابويه كانا طوال عمرهما لا يعرفان حقدا ولا تنافسا ولا صراعا على حياه زائله .. فقد عاشا سنوات عمرهما في حالة رضا تام .. ورزقهما الله بر ومحبة اولادهما ..

ونشأ بطل سطورنا وسط اصدقاء وزملاء من نفس البيئة الهادئة الجميلة ومتوسطة الحال والمحبة لكل خير .. وعاش طفولته ببراءة وشقاوة كل الاطفال .. لا يحلم الا بيوم يستطيع مساعدة والده في مسؤولياته وتعويض والدته عن شيئا مما أعطت له ولأخوته ..

كانت قمة سعادته وهو يتابع مداحا للرسول جاء إلى القرية ليحي مولد الشيخ محمد الحج على الشهر وقتها .. او حينما يفوز في مباراة لكره القدم .. او وهو يترقب نتائج نجاحه بمدرسته ليرى بعضا من السعادة على ملامح والديه الطيبين

وكما هو الحال في معظم القرى المصرية فترة السبعينات والثمانينات .. كان كل شباب القرية ينتظر الانتهاء من دراسته ليبدأ رحلة السفر

للخارج التي لا يعرف متى تنتهى ..

وبالفعل بدأ بطل هذه السطور رحلته مع الغربة !!..

وكان الاختلاف واضحا فلم يكن هدفه تحقيق احلامه الشخصية فقط .. وإنما راح يحلم ويخطط بينه وبين نفسه في أمر قرينته بالكامل .. فهو يعلم مشاكلها ويعرف احتياجاتها ..

كما كان دائما له عتاب على معظم من سبقه من شباب القرية الذين حققوا النجاح واكتسبوا الملايين .. فلا أحد منهم فكر في مساعدة اهل القرية البسطاء .. ولا أحد منهم حاول التفكير في صالح الاجيال القادمة ..

ولاحظ أيضا أن معظم من نجح من اهل قرينته يكتفى ببعض المساعدات الخاصة والشخصية من باب الزكاة او الصدقة .. ومنهم من لم يمد يد المساعدة حتى لأهله والاقربين ..

فكان في حيرة من أمره .. كيف يبدأ .. وماذا سيكون رد فعل الآخرين .. وهل سينجح في تحقيق شيئا ما لناسه وأهل بلدته

في الحقيقة يحسب له تماما نجاحه في تجاهل حزب أعداء النجاح الموجود في كل مكان وزمان .. خاصة في القرى والمجتمعات الصغيرة والمغلقة .. والتي يكثر فيها القيل والقال .. فداء كل ناجح في نظرهم هو فاسد .. وكل متميز هو فاشل .. وكل مجتهد يرونه حقق نجاحه بضربة حظ وليس بتوفيق من الله ثم باجتهاده وتعبه واصراره على النجاح ..

فيحسب له عدم التفاته للصغائر وإيمانه ان للنجاح دائما ضريبه وثنما لابد وأن يدفعه من اسمه وسمعته ..

وراح يفكر ماذا يمكنه أن يقدم لأهل قرينته

وبدأ بذكاء وعفوية اهل القرية الطيبين في تجميع كل الناس على هدف واحد .. وهو شراء مساحة ارض لإنشاء مدرسة ثانوي تفيد ابناء البلدة .. وكان الهدف الاساسي هو ايجاد سبب ليلتف حوله الجميع .. فكر وقرر وبدأ التنفيذ .. وبدأ بنفسه حين أعلن عن تبرعه بمبلغ مالي من ماله الخاص ومن معارفه ومحبيه .. وراح يتنقل بين مدن المملكة العربية السعودية التي يعمل بها منذ سنوات .. والتقى بكل من يعرف ومن لا يعرف من أهل قريته .. ووجد الدعم والتشجيع من الغالبية العظمى ممن لا يبحثون عن زعامة وقتيه ولا يهدفون لبطولة او استعراض .. وزاد على ذلك انه خاطب بود كل محب لمصر وشعبها من الاشقاء السعوديين والذين ساهموا وساعدوا بقدر كبير .. وبالفعل نجح ومعه المخلصون من ابناء القرية في شراء الارض المخصصة للمدرسة .. وشراء سيارة إسعاف مجهزة تكون في خدمة أي مريض بقريته ..

بالإضافة الى المساهمة في أعمال خير كثيره ومساعدة العديد من الأسر الفقيرة وإعادة بناء مسجد القرية القديم ..

وكان مجمل تبرعاته هو وصحبه من شرفاء القرية:

لأرض المدرسة مبلغ ١٢٣٠٠٠٠ جنيه ومعه شباب ورجال قريته الكل ساهم بما يستطيع

ولسيارة الاسعاف ٥٠٠٠٠٠ جنيه وكان لإحدى عائلات قريته وهي عائلة الشيخ النصيب الأكبر من المساهمة وتبنى هذا المشروع

ولبناء المسجد ٦٠٠٠٠٠ جنيه تم توفيرها في وقت قياسي ..

وهو ما يعنى ان إجمالي المساهمات لصالح القرية في عام ٢٠١٨ وصل لمبلغ اثنين مليون وثلاثمائة وثلاثون الف جنيه .. كان هو اكبر

مساهم من ماله الخاص بمبلغ ٢٢٥ ألف جنيه .

وكانت فرحته كبيره ليس لنجاحه في فعل ذلك فقط ولكن الأهم انه حرك الخير في قلوب الجميع .. لأنه يعلم أن كل نجاح من ابناء القرية يتمنى المساعدة .. ولكن تمنعه دائما ظروف انشغاله او لعدم معرفته باحتياجات البلدة او لتخوفه من اعداء كل نجاح وبعض الراضين لكل خير والمرددين دائما لكل كلمات الاحباط والافشال ..

بطل سطورنا هذه لم يأخذ من وطنه مصر سوى تعليم مجاني عادي .. ولم يحصل على وظيفه حكومية ولا علاوة تشجيعيه ولا مركزا حكوميا مهما .. لم يأخذ شهره او مال أو سلطه مثل غيره .. ولكنه أعطى الكثير لبلده .. واعطى القدوة لمن يأتي بعده ..

فهذا الرجل لا يقل أهميه عن محمد صلاح نجم الكره الشهير او مجدى يعقوب العالم الكبير او صلاح عطيه الذى تاجر مع الله ونال محبة الجميع ..

هو ناصر رضوان ابن قرية كفر الحطبة المصرية البسيطة والتابعة لمركز شربين بمحافظة الدقهلية ..

والتي من ابنائها لاعب كرة القدم اسامه قنديل رحمه الله والذى كان اول من ظهر على شاشة التلفزيون من ابناء القرية ورحل في ريعان شبابه .. وأيضا ظابط الشرطة الانسان عاطف عبدالحميد رحمه الله .. وكذلك الشاعر الغنائى المعروف بخيت بيومي ..

وفي الجزء الثاني من كتابنا ناسك يا وطن سنذكر كل من تعاون بحب وبالأسماء لان منهم من له حق الشكر مثل المهندس نصر منصور الذى سبق الجميع بالتبرع بارض مدرسة تحمل أسمه بنفس القرية منذ سنوات ..

وايضا أبناء القرية الشرفاء الأساتذة السيد الشربيني جبر وأحمد
عظالله وغيرهما من عائلة الشيخ المحترمين الذين سارعوا بالتبرع
لشراء سيارة اسعاف تخدم اهل بلدتهم

وكذلك المحب لمصر وناسها الطيبين رجل الأعمال السعودي الناجح
محمد احمد على بانافع الذى لم يتأخر أبدا عن الدعم والمساعدة في
كل أعمال الخير بالبلدة ..

ومؤكد ليس وحده ناصر رضوان من فعل ذلك .. فمصر ورغم
كل شيء مليئة بالشرفاء الحقيقيين الذين قرروا التمرد على كل الظروف
الصعبة ونجحوا في تحقيق أحلامهم الخاصة والعامّة ولم يستسلموا
لليأس ولم يرددوا مع صلاح جاهين مقولته الشهيرة

يا شعب نايم ع الرصيف وبالمقشه بتتكس

فيك ناس بتشقى ع الرغيف

وناس بتتعب م التنس

(24)

العالمي

صلاح: والله برافو عليه الراجل ده .. واحد غيره كان فكر في نفسه
وبس

فرح: معقول يا ماما مصر فيها ناس كتير زي الراجل ده

الام : مصر كبيره اوى يا ولاد .. مصر تاريخ وجغرافيا وحضارة
وشعب عظيم .. مصر طول عمرها اهم دولة في العالم .. مصر مش
نيل واهرامات وبس .. مصر ناسها غير أي ناس في العالم كله .. مصر
التسامح والإنسانية .. مصر الرجولة والجدعنه والشهامة .. مصر
انتم الشباب الي زي الورد ال مهما كانت الظروف صعبة هتهزموها
وهتنجحوا وهتكبروا .. وهتخلوا مصر ام الدنيا وأد الدنيا بجد .. ودا كلام
حقيقي مش شعارات

فرح: يااه .. انتي بتحبي مصر اوي يا ماما

صلاح: واحنا كمان بنحبها بس بصراحة مصدومين في معظم الكبار
او الي كنا فاكرينهم كبار .. كان نفسنا نلاقي واحد منهم نعتبره قدوه
الام: قولتلكم في الف حد تقدروا تعتبروه قدوه .. يعني مثلا لو
قولتلكم على راجل مصري رفض كل المناصب والالقاب والفلوس في
بريطانيا .. واختار يرجع مصر .. ويعيش مع ناس مصر .. ويعالج
اطفال مصر .. وكل ثانيه في عمره بيعمل الخير لمصر .. راجل زي ده
ميعتبرش قدوه !!

فرح: ايوه عارفاه وشوفته في الغنوة مع دنيا سمير غانم

صلاح: غنوة ايه .. ماما تقصد مين يا فرح

الام: اقصد الدكتور مجدي يعقوب يا صلاح .. اقرأوا السطور الجايه
واعرفوا حاجه بسيطة من الف حاجه عملها فخر مصر والعالم كله
مجدى يعقوب

(25)

ملك القلوب

أسمه مجدي حبيب يعقوب .. ابن مصر البار .. اتولد ١٦ نوفمبر ١٩٣٥ ونشأ في عائلة قبطية أرثوذكسية بسيطة محبة لكل الناس .. نشأ في مدينة بلبيس، محافظة الشرقية،

درس الطب في جامعة القاهرة .. وكمل دراسات عليا في امريكا .. ثم انتقل إلى بريطانيا في عام ١٩٦٢ ليعمل في مستشفى الصدر بلندن .. ثم أصبح أخصائي جراحات القلب والرئتين في مستشفى هارفيلد سنة ١٩٦٩ .. ثم مدير قسم الأبحاث العلمية والتعليم منذ عام ١٩٩٢ واهتم بتطوير تقنيات جراحات نقل القلب منذ عام ١٩٦٧.

في عام ١٩٨٠ قام بعملية نقل قلب لمريض اسمه دريك موريس .. والمريض ده عاش ٢٥ سنة بعد العملية .. ويعتبر أكثر مريض عاش بقلب منقول حتى موته في يوليو ٢٠٠٥

من بين المشاهير ال أجرى لهم الدكتور مجدي يعقوب عمليات كان الفنان الكوميدي البريطاني إريك موركامب

أسس مجدي يعقوب ”سلسلة الأمل“ في المملكة المتحدة عام ١٩٩٥ .. وهي مؤسسة طبية خيرية تهدف إلى مساعدة الأطفال الذين يعانون من أمراضٍ قلبيةٍ خطيرةٍ تهدد حياتهم

تكريمات مجدي يعقوب:

لقب فارس من ملكة بريطانيا عام ١٩٩١

وسام دولة باكستان

وسام الجمهورية اللبنانية

وسام مدينة بارما

وسام مدينة أثينا

وجائزة راي فيش من معهد القلب في تكساس للإنجاز العلمي في

أمراض القلب والأوعية الدموية عام ١٩٩٨

وجائزة الإنجاز المتميز عام ١٩٩٩

وجائزة غولدن هيبوكريتس الدولية للتميز في جراحة القلب عام ٢٠٠٣

وجائزة الجمعية الدولية لجراحة القلب وزرع الرئة عام ٢٠

والميدالية الذهبية من الجمعية الأوروبية لأمراض القلب عام ٢٠٠٦

ووسام الاستحقاق من رئيس الأكاديمية الدولية لعلوم القلب

والأوعية الدموية عام ٢٠٠٧

وقلادة النيل العظمى للعلوم والإنسانية عام ٢٠١١

وأهم من كل ده ان مجدى يعقوب .. وبعد رحلة نجاح وعطاء

أنساني شهد له العالم كله بالأستاذية والعبقرية .. رفض انه يعيش في

اي دولة غير مصر .. واختار يخدم اطفال مصر .. وأنشأ معهد القلب

في أسوان وعمل منه منارة انسانيه وعلميه عالميه بيزوره الاف المرضى

كل عام من الدنيا كلها

ومجدى يعقوب بيقدم الرعاية والعلاج للمصريين كل يوم بحب

وتواضع شديد .. لدرجة انك ممكن تلاقيه واقف ف الطابور عادى

في السوبر ماركت أو غيره .. علشان كده اعتبره الناس ملك القلوب
والتواضع .. ال فاتح قلبه لكل مرضى القلب من البسطاء والغلابه ..
وهو ده مجدى يعقوب المصري وابن البلد والعالم الكبير وفخر
العالم كله .

(26)

كاتب السطور

تقف فرح فجأة في سعادة بعد نهاية حلقة مجدى يعقوب وكأنها وجدت شيئاً إيجابياً وسط حالة اليأس والإحباط التى تعيشها هى وزوجها

فرح: رائع محمد صلاح ومجدى يعقوب يا ماما

الأم: قتلتم مصر فيها مليون حد شريف .. بس المشكله ان الاعلام مركز مع النماذج السلبيه

صلاح: فعلا .. نادر جدا لما نسمع أو نقرأ عن شاب مصرى نجح فى اى مجال غير الفن والكوره

فرح: عجبنى برنامج ناسك يا وطن ده .. ياريت يكون رسالته وصلت وكل المشاهير بعملوا الصح لبلدنا

الأم: انا واثقه ان كثير منهم هيعملوا ده .. وهيينوا من مالهم الخاص مدارس ومستشفيات ومصانع ومشاريع تفيد البسطاء زى ما اخدوا من الوطن تعليم وشهره وفلوس وغيره فرح: طيب يا ماما .. ما اكيد ناس كثير هيسألوا مؤلف الكتاب ومقدم البرنامج ال عامل فيها ناصح أمين ده عمل ايه للبلد مقابل ال اخده منها

الأم: عندك حق يا فرح .. واثمنى يكون عنده اجابة لسؤالك .. عملت ايه لبسطاء الوطن مقابل ما أخذت من تعليم وشهره ومكانة اجتماعية مثل العشرات غيرك من الصحفيين والفنانين !!؟

الفهرس

٥(١)
٩ (٢) الشباب والبرادعي
١٣ حلقة البرادعي
٢٣ (٤) حسان الذى لا تعرفه
٢٥ (٥) حلقة محمد حسان
٣٣ (٦) فيفي لا ترقص وحدها
٣٥ (٧) حلقة فيفي عبده
٤١ (٨) الزعيم
٤٣ (٩) حلقة عادل امام
٥١ (١٠) عمرو اديب
٥٣ (١١) عمرو اديب الذى تعرفه
٦١ (١٢) لميس والإخوان
٦٣ (١٣) حلقة لميس الحديدي
٦٩ (١٤) محمود سعد مع مين
٧١ (١٥) حلقة محمود سعد
٧٩ (١٦) منى ووائل غنيم
٨١ (١٧) حلقة منى الشاذلي
٨٩ (١٨) زمن هيفاء وهبي
٩١ (١٩) حلقة هيفاء وهبي
٩٧ (٢٠) صلاح فخر العرب
١٠١ (٢١) صلاح الملك المصري
١٠٥ (٢٢) ابن البلد
١٠٧ (٢٣) ابن البلد والغرية
١١٣ (٢٤) العالمي
١١٥ (٢٥) ملك القلوب
١١٩ (٢٦) كاتب السطور

